

JUAN JESUCRISTO ENIRUEMO ILLA RAFUE CUIAFUE

Jesucristo rafue iese tainede

¹ Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui. ² Jusiñamui diga jaca nano ite. ³ Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede. ⁴ Naimie muidona iticai. Naimiena cai ñnuamona, jaca iiticai. Lligaiñora diga rana cai ciua isoi, caina Jusiñamuina uiñotade. ⁵ Naimiena ñnoñedino jitiredinomo itimaci isoidimaci. Naimaci comeciái jitirede. Ie uaido naimaci comeciaina lligaiñote, naimaci comeciaino ite jeacino oni jaillena.

⁶⁻⁷ Naimaci comeciaina lligaiñotimiena llollena, Juan micori llucinodo Jusiñamuina nana comini ñnollena, Jusiñamuidi Juan Bautista raillamie micorina oretate. ⁸ Juan naie lligaiñoñedimie; iadedi Juan naimiena lluaibite. ⁹ Nanoca lligaiñotimiena llote. Nanoca lligaiñotimiedi eniruemo billanona, nana comini comeciaina lligaiñote. ¹⁰ Naimie muidona comini comuidimaci; iadedi naimie bene billa meinocni, comini dinena naimiena uiñoñedimaci. ¹¹ Ie nairai illanomo naimie ride; iadedi nana cai nairai naimiena feiñoñedimaci. ¹² Damierie naimiena feiñotimaci. Naimiena ñnotimaci. Ie uaido naimiedi naimacina Jusiñamui uruiaina itatate.

¹³ Iena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicai. Comini jitaillamona iena jaiñedicai. Buena cai finuamona iena jaiñedicai.

¹⁴ Iemo caina Jusiñamuina uiñotallena, Jusiñamui Jito comena jaide. Naie facaise cai comini motomo naimie ite. Cai comina eo duenaite. Uanaicinona llouide. Ie siño uaina uiñocana jaidicai. Jusiñamui dajede ie Jitona ciodicai. ¹⁵ Juan micori naimiena cominimo jaie llote:

—Birui omoimo lloticue; iadedi jiaimie cue ifo meidoite. Cue baifemo faite. Cue nia jeiciñenia, naimiedi jaca ite —llote.

¹⁶ Jesucristo caina eo duenaillamona, birui caina eo canocabide. ¹⁷ Moisés micori Jusiñamui uaina jaie llote; iadedi iemona Jusiñamui caina duenaillana jaie raise uiñoñedicai. Jesucristo lluamona Jusiñamui caina duenaillana jai raise uiñoticaí. Naimiemona uanaicinona jai raise cacadicai. ¹⁸ Jaca buna Jusiñamuina cioiñede; iadedi dajede ie Jito caina naimiena uiñotade. Ie Moo diga danomo illamona, Jesús naimiena uiñote.

*Juan Bautista micoridi Jesúna llua rafue
(Mt 3.11-12; Mr 1.7-8; Lc 3.15-17)*

¹⁹ Jerusalémona Juan micori dine judíuai illaicomini Jusiñamui diga ñairainimona dajerie oredimaci. Jusiñamui diga ñairaini canorainimona dajerie jiai oredimaci. Naimiemo:

—¿Budío? —raillano jicanotadimaci. Juan dine rillanona, raitimaci:

—Cai Jilloitaraima biite raillaimiemo ocuridicai. Cristo raillamie billemo ocuridicai. ¿Odi

naimiedio? —raillanona jicanotimaci. ²⁰ Naimie dinena janofede; ia:

—Imieñedicue —raite.

²¹ Dane naimiemo jicanodosite:

—¿Budío? ¿Elías?

Juan micori dinena uai ote:

—Elíañedicue.

Raitimaci:

—Moisés micori Jusiñamui facaina lloraíma ico billena jaie llote. ¿Odi naimiedio?

Juan dinena raite:

—Ieñedicue.

²² Dane jicanotimaci:

—¿Budío? Caimo llono, cai oretatinomo cai lollena. ¿Niese naimacimo ona lloiticai?

²³ Juan dinena raite:

—Jofue iñenanomo ado llotimiedicue. Isaías micori jaie llua isoi llocabiticue: “Cai Nama biite. Naimie naiso atona raise fino”. Iese lloticue; ia naimie uaina omoi feiñollena, omoi comeciai raise finollena ñaiticue.

²⁴ Juan dine bitinodi fariseuai comini. ²⁵ Nia jicanoiacadimaci:

—Odi cai Jilloitaraímañenia, o Elíañenia, o Moisés micori llotimieñenia, ¿bue ñellena cominina bautizadio? ¿Nie isoide uai omo ite? ¿Ninomona o uaina otio?

²⁶ Juan dinena uai ote:

—Cominina bautizadicue; iadedi omoi motomo omoi uiñoñegamie jai ite. ²⁷ Naimie cue ifo meidoite. Cue baifemo faite. Jamai bue cue isoilla jira, naimie illafomo cue riñena jira, naimiena canonidicue.

28 Naie rafuedi Betábaramo suide. Jordán railla ille ruicafebeimo ite. Nainomo Juan bautizaude.

Juan micori Jesúna dane llua rafue

29 Ie areruido Juan micoridi Jesús naimie dine billana ciuano, naimiena raite:

—Ero, Jusiñamui Jito toica llauda mamecido jai bite. Cai jeacino facaina faga llauda ifomo Jusiñamui ie Jitona jai orede. Naimie fallemona comini jeacinona dotaite. 30 Navui naimiena ñaiticue. Lloticue: “Cue ifo jiaimie meidoite. Jamai bue isoidicue; iadedi naimie jamai bue isoñede. Cue nia jeicifñenia, naimiedi jaca ite”. 31 Cue dine naimie nia biñenia, naimiedi cai Jilloitaraimana uiñoñedicue; iadedi cominina bautizallena bene iticue, cai cominimo naimiena llollena.

32 Juan jiai llote:

—Monamona ucugi isoi Jusiñamui Joreño ana billana cidicue. Jesúmo baite. 33 Naimiedi cai Jilloitaraimana nia uiñoñedicue; iadedi cominina bautizallena, cuena oretagamiedi jaie cuemo llote: “Cue Joreño ana billana damiemo baillana ico cioitio. Cue Joreño baillamiedi cue Joreño omoimo fecaite”. 34 Naie rafuena cidicue. Iemona naimiedi Jusiñamui Jitonana lloticue.

Jesús ie fetocaga comini ie rafue

35 Ie areruido Juan micori llofueoicaiganomona menamie Juan micori diga ia, 36 Juan micori Jesús macarillana ciuano, raite:

—Ero, Jusiñamui Jito toica llauda mamecido jai bite.

³⁷ Juan micori diga itiaimaia naina cacajano, Jesúna racadiaimaia. ³⁸ Jinafo dine erodajana, Jesús iaimaia cide. Iaimaiaimo jicanote:

—¿Buena jitaídomico?

Iaimaia dinena uai otiaimaia:

—Rabbí, ¿ni o jofó? ¿Ninomo itio? — uai otiaimaia. Rabbí oni dobaiñuamona: “Llofueraima raillamie”.

³⁹ Jesús nai iaimaia uaina ote:

—Mai. Cue diga bi, omico uñollena. —Ie jira jaidiaimaia. Jesús illanona codiaimaia. Jitoma nia a illa jira, nairuido naimie diga fiebidiaimaia. Jitirecaidemo oni jaidiaimaia.

⁴⁰⁻⁴¹ Naie iaimaiaimona damie Andréna mameciredimie. Jesús dinena naimie jaidemo, ie ama nano jenuaide. Naimie amadi Simón Pedro. Naimiena baillanona, llote:

—Jai cai cominina Jilloitaraimana baiticue. Cristo raillamiena baiticue.

⁴² Ie mei Jesús dine naimiena uite. Jesús naimiena eo eruaillanona, raite:

—Birui o mamecidi Simón. Juan ie jitodio. Biruimona Cefana jiai mamecirenitio —raite. Oni dobaiñuacidi Pedro.

Jesús menamie uaidua raufe

⁴³ Ie areruido Jesús Galileamo jaiacade. Felipena baillanona raite:

—Cue llofuegamiena o jaillena, cue diga coco jaillesa, mai cue diga bi. ⁴⁴ Felipedi Betsaida nairai imie. Andrés iaimaia Pedro diga daje nairai iaimaia. ⁴⁵ Jesús naimiemo llua mei, Felipedi Natanaelna oni jenuaide. Higuera railla riarana naimiena baillanona, raite:

—Moisés micorí jaie cuegamiena jai baiticue. Jusiñamui lloraini micoriaidi naimiena jaie jiai cuetimaci. Naimiedi Jesús. Nazaret imie. Ie moodi José.

⁴⁶ Natanael naie nairaina uaitajanona raite:

—Nainomo mare comedi iñede.

Felipe dinena raite:

—Naie o uiñollena, cue diga mai bi.

⁴⁷ Jesúsmona iaimaiai iaire ia, Jesús dinena llote:

—Ero, buna jifueñegamie billa. Nanoca Israel imie bite.

⁴⁸ Natanael dinena uai ote:

—¿Bu cuena llogao? ¿Ñiese cuena uiñotio?

Jesús uai ote:

—Felipe ona ailli nia baiñenia, higuera railla riara anamo o illana jai uiñoticue.

⁴⁹ Jacinaillamona, Natanael dane uai ote:

—Maestro, odi Jusiñamui Jitodio. Cai comini illaimadio.

⁵⁰ Jesús dinena uai ote:

—Amena anamo o illana cue uiñua jira, cuena ñnotio. Diga siño rafuena ciojitio. Bie rafue baifemo finuana ciojitio. ⁵¹ Jusiñamuimona bil-lanona, imana jaidicue. Uanaicino omo lloticue. Mona ecorillana o cioia, Jusiñamui jaienisaí cue dine billena cioitio. Cuemona abido jaillena jiai cioitio.

2

Jinuimona Jesús vino finua rafue

¹ Menarui illanona, Galileamo Canámo ñima ie ai uarafue ite. Rafue nama uaidua jira, nainomo Jesús ei jaide. ² Jesús jiaí uaidoga. Ie llofueoicaiganodicaí jiaí uaidogacaí. ³ Vino cueillanona, Jesús ei Jesúmo llote:

—Vino jai ññede.

⁴ Jesús ñinena uai ote:

—Quei, ¿bue ññellena iese cuemo llotio? Siño rafue cue finolle facaisedi ñia riñede.

⁵ Iemei ie eidi rafue nama mullaiaimo llote:

—Naimie omoimo lluaña fino.

⁶ Jinui nainomo eenollena, nainomo seis noñicimona finoca llerodana raísoide. Naiemona jinuína ouidimaci. Mareña illena, caí einamací llua isoi, jofomo naimaci ría, naimaci abiaína llereuidimaci. Naga lleroda ñibai cinco latas totaca. ⁷ Mullaiaimo Jesús llote:

—Naie llerodaiaína jinuí ñiga oruita. — Pozomona jinuí atiano, naie llerodamo toidimaci.

Iena finua mei, ⁸ Jesús naimacimo llote:

—Llerodamona janore jisa uanona, rafue nama ñine uiño.

⁹ Naie facaiseconi naie jinuidi vinona jaide. Rafue nama naieña facade. Naimiedi ñinomona naie vino uana uiñoñede. Dani nainomo ite mullaiaí uiñotimaci. Jirua mei, ai otimie uaiduano, ¹⁰ raite:

—Rafue bu finoa, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

¹¹ Galileamo Canámo Jesúsdi siño rafuena nano finode. Iemona caña ie uai siñona uiñotade. Ie muidona naimie siño Jitonana ñnoticaí.

¹² Rafue fuilla mei, Capernaumo Jesús ie ei diga, ie amatiai diga, ie llofueoicaiganodicaí diga jaide. Nano nigarui nainomo iticaí.

Jusiñamui jofomona Jesúdi rana fecarainina dotaja rafue

(Mt 21.12-13; Mr 11.15-18; Lc 19.45-46)

¹³ Pascua railla rafue iaire iacana jira, Jerusalémo Jesús caí diga jaide. Egiptomona caí jaiagai jillobillana começillena, naie rafue ite.

¹⁴ Rillano, Jusiñamui jofomo diga rana fecarainina çide. Ucube ollena, nainomo juraretaiai, toica llaudaiai, ucugiai fecauidimaci. Ucubena meidorainidi jiai itimaci. ¹⁵ Naimaci ocainaiiai diga naimaci jino jiullena, rao Jesús uanona, iena lleride. Naimaci ucubena judaide. Mesaiaina oni caitade. ¹⁶ Ucugiaina fecarainimo llote:

—Omoí ucugiaina jino uiño. Cue Moo jofomo ra feca-fecajana jitañedicue —llote.

¹⁷ Iemo Jusiñamuina lloraini micoriai cuega-fuiaina jai começiticaí. Iese jaie cuega: “O jofona cue riiduamona, jiaíno cuena meinetaitimaci”.

¹⁸ Nainomo ite judíuai illaicomini dinena raitimaci:

—¿Nie isoide uaido naimacina jino oredio? Siño rafuena fino, siño uai omo illana caí uiñollena.

¹⁹ Jesús uai ote:

—Bicona judai. Darui amani maijiamona iena dane nillana fuidoitícue.

²⁰ Dane raitimaci:

—Cuarentiséis años bicomo maijidimaci, iena finollena. ¿Nieese iena darui amani illanona, iena dane nillana fuidoitío?

²¹ Iese raitimaci; ia Jesúdi Jusiñamui jofona ñaiñede. Dama ie abina ñaite. Fiodaillamona

ie jilloillena ñaite. ²² Jesús fiodaillamona naimie jillua mei, ie llofueoicaiganodicaí bie llucina comeciticaí. Ie jira naie ciegafuena ñnoticaí. Jesús llucina jiaí ñnoticaí.

Jesúdi comini comeciámo iticino llua jitañena rafue

²³ Pascua railla rafue facaiseconi Jerusalémo Jesús ia, diga siño rafuena finode. Ie jira ail-luena comini naimie uaina ñnotimaci. Coniniri raitimaci:

—Naimiedi caí Jilloitaraima. ²⁴ —Naganomo comeciána naimaci facaja jira, naie comina naimie uñuamona, Jesús naimaci motomo iacañede. ²⁵ Naimaci comeciámo iticinuaina naimie eo raise uñua jira, comini rafuena naimiemo bu llua jitañede.

3

Nicodemo Jesús diga ñaia rafue

¹⁻² Judúuai illaicominimona damiedi Nicodemo. Naimiedi fariseo imie. Naiona Jesús dine bil-lanona, raite:

—Maestro, caí comina llofuellena, Jusiñamui ona orede. Iena uñoticue. Siño rafuena o finua jira, Jusiñamui uai omo illana uñoticue.

³ Jesús dinena uai ote:

—Raise llotio; ia daje rafue omo lloticue: Uanai omo lloticue. Dane abido comonori o jeiciñenia, Jusiñamui ie comina sedajonomo jaca initio.

⁴ Nicodemo abido jicanote:

—¿Ñiese eimie ie ei jeraimo dane iite? ¿Ñiese dane comonori jeiciite?

⁵ Jesús uai ote:

—Uanai omo lloticue. Jusiñamui ie comini sedajanomo o illena, dama o eimona jeiciñellio. Jusiñamui Joreñodo bu dane comonori comuitañenia, Jusiñamui ie cominina sedajanomo jaca iñeite. ⁶ Comemona cai comuitaia, jaca comedica; iadedi Jusiñamui Joreñodo cai comuitaiadedi, Jusiñamui uruedica. ⁷ Omo dane lloticue: Comonori jeicia. Ieri rajicaiñeno. ⁸ Iena o raise cacailena, jaiie rafuedo iena lloticue. Aifidi ie jitailla dine sairide. Iena cacadio; iadedi ninena billana uiñoñedio. Nine jaillana jiai uiñoñedio. Ie isoide. Niese Jusiñamui Joreño cominina comuitajana jiai uiñoñedio.

⁹ Nicodemo dane jicanote:

—¿Niese biedi dane iite? Raise cacaiñedicue.

¹⁰ Jesús uai ote:

—Jusiñamui rafuena omoi cominina llofuecabitio. Jusiñamui rafuena omo lloticue; ia iena raise cacaiñedio. ¹¹ Uanaicinona omo lloticue. Abi uiñuamona omo lloticue. Cue cúa rafuena lloticue; iadedi cue lluaña ññoñedio. ¹² Bene ite rafuena cue lloia, iena ññoñediota, monamo ite rafuena cue lloia, iena jiai raise ññoñeitio. ¹³ Eniruemona monamo jaca buna jaiñena jira, monamo ite rafuena bu raise uiñoñede. Monamona cue billa jira, nainomo abido jaiticue. Ie muidona nainomo ite rafuena uiñoticue. ¹⁴ Monamona biticue; ia amenamo fiodaiticue. Jofue iñenanomo Moisés micori jaiio joreño amenamo jaiie cuinade. Jaioniai ainillamona comini fiodaiñellena iena cuinade. Comini ie isoi jilloillena, ie isoi cuena coraitimaci.

15 Cue fiodaillamona bu cue uaina ñnoia, monamo jaca iite.

Jusiñamuidi cominina eo isiruilla rafue

16 Jusiñamuidi cominina eo isiruilla jira, comini dine ie damiede Jitona orede. Ie Jitona naimaci ñnollena, naimiena orede. Naimiena ñnuamona, monamo jaca iitimaci. Jiai faifñeitimaci.

17 Naimacina duere finotallena ie Jitona oreñede; iadedi naimaci jeacinomona jilloillena, naimiena orede.

18 Jusiñamuidi Jesús uaina ñnotinona jaca duere finoñeite; iadedi ie dajede Jitona uaina naimaci ñnoñena jira, Jusiñamui duere finollicino anamo jai itimaci.

19 Comini comeciaina lligaiñollena, Jusiñamui Jito bite. Jeacino comeciaino illana naimaci uiñollena, naimaci comeciaina lligaiñuaibite; iadedi naimaci comeciaino jitre dinomo iacana jira, jearede rafue naimaci finua muidona, naimiena jitañedimaci.

Ie jira Jusiñamui naimacimo duere finollicinona anamo jai itimaci.

20 Naimie finoca rafue bai raillano, naga jeacino finoraíma ie comeci lligaiñuana jitañede;

21 ia Jusiñamui jitaillacinona finodino naimaci finoca rafue baillena, lligaiñotimie dine marefodo bitimaci.

Juan micoridi Jesúsane ñaia rafue

22 Digarui illanona, Jesús ie llofueoicaiganodicai diga, Judea railla eniruemo macaricana jaidicai. Nainomo diga irui fiebidicai. Llofuiamona ñnotinona bautizacana uiticai.

23-24 Nia cárcelmo iñenia, ailluena jinui nainomo illa jira, Enón railla nairaímo bautizajonomo Juan micorí jiai ite. Salim railla nairaí iaírei ite.

25 Naie facaise Juan micorí

llofueoicaigano judíuai imie diga bautizajana siadotimaci. ²⁶ Ie muidona Juan micorí dñe billanona, raitimaci:

—Maestro, navui Jordán ruica dñe damie bil-lena llotio. Naimiena o bautizallena, o dñe navui bite; iadedi birui naimiedi cominina bautizade. Ailluena comini naimie dñe jaioidimaci. O dñe jai raise biñedimaci.

²⁷ Juan uai ote:

—Jusiñamui ie uai fecañedena, Jusiñamui fa-caina buna jaca buena finonide. ²⁸ Cue llua-na navui cacadomoi. Lloticue: “Cai comini Jil-loitaraimañedicue. Cristoñedicue. Naimie billena cue lollena, Jusiñamuidi naimie uicomo cuena orede”. ²⁹ Jiaie rafuedo iena lloticue. Damie ie aina ua mei, dama naimiemo duide. Ie aina ua rafue facaise, naimie nabai iena ciuano, ieri jiai iobide. Ie isoide. Comini cue dñe navui biñoidimaci. Birui Jesúmo jaioidimaci. Naimiemo jai duidimaci. Iena cue cacajamona, ieri iobidicue. ³⁰ Comini naimie uai siñona uiñuana jitaidicue. Comini cue jamai bue isoidimiena uiñuana jiai jitaidicue. ³¹ Jamai comedice. Ie jira eniruemo ite rafuena llocabiticue. Jusiñamuimona Jesús billa jira, cai baifemo faite. ³² Ie Moo illanomo ciua rafuena llote. Ie Moo illanomo cacaja rafue jiai llote; iadedi eo janore comini naimiena ñnotimaci. ³³ Naimiena ñnotimiedi Jusiñamui uanaicinona llua-na raise uiñote. ³⁴ Jusiñamuidi ie Joreño ie Jit-omo caidiñeno fecaja jira, naimie Jusiñamui uaina llocabite. ³⁵ Jusiñamuidi ie Jitona isiruite. Ie jira naga rafue naimiemo fecade. ³⁶ Bu Jusiñamui Ji-ona ñnoia, Jusiñamui illanomo jaca iite; iadedi bu

naimiēna #noñenia, Jusiñamui illanomo jaca iñeite. Jusiñamui rīcaillafue anamo jai ite.

4

Galileamo Jesús jailla rafue

¹⁻² Naie facaise ailluena comini Jesúsmona fueotimaci. Iemei naimie dibeido bautizadimaci. Naimacina naimie bautizallena, janore comini Juan dine jaide. Jesúsdi bautizañede. Dani ie llofueoicaiganodicai bautizadīcai. Fariseuai bie rafuena fidiano, iena Jesús uiñua jira, ³ Judeamona Galileamo Jesús cai diga dane abido jaide.

Samaria iñaiño diga Jesús ñaia rafue

⁴ Galileamo jaillena, Jesúsdi Samaria railla enirue dibeido jaiacade. ⁵ Samariumo cai ria, Sicar railla nairaimo iairei rillano, daje pozomo ridīcai. Naie pozodi Jacob micori jaie finoca. Jacob micori naie pozo illano ie jito José micorimo jaie fecade. ⁶ Jitoma naidai itemo, naie pozo fuemo cai rillano, Jesús ana raide. Are macarillanona, jafaici ote. ⁷⁻⁸ Jesús pozomo fiebicailla meinona, Sicarmo jaidīcai, guille ollena. Cai jailla mei, Samaria iñaiñodi jinui ollena, pozomo bite. Jesús naiñaiñomo jicade:

—Jinuina cue ine, cue jirolesla.

⁹ Naiñaiñodi uai ote:

—Judío imiedio. Samaria iñaiñodicue. ¿Niese cuemo jinuina jicadio? —Naiñaiño iese raite, judíuai Samaria comini diga ñairainina jira.

¹⁰ Jesús dinena dane uai ote:

—Jusiñamui omo fecaacalle ra uiñotiodena, o diga ñaitimiena uiñotiona, cuemo jaca itataite jinuina cuemo jicadio. Iemei omo iena fecadicue.

¹¹ Naiñaiño uai ote:

—¿Ñiese bie pozomona jinuina oitio? Eo ana ite. ¿Ñinomona jaca itataite jinuina oitio? ¹² Cai usuma Jacob micori bie pozo caimo jaie iñonocaiga. Naiemona naimie micori jaie jirode. Ie urui ai micoriai jiai naiemona jirodimaci. Ie ocainaiai da-jemona jiai jirodimaci. Cai usuma micori baifemo faiñedio —raite.

¹³ Jesús uai ote:

—Nagamiai bie jinui jirua mei, dane jiroacanite; ¹⁴ iadedi cue fecalle jinui jirua mei, dane jiroacaiñenite. Cue fecalle jinui, torafo illa iso, naimiemo jaca iite. Jusiñamui dine illena, naimiena jaca itataite.

¹⁵ Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

¹⁶ Jesús dinena uai ote:

—O jofomo mai jai. O ini diga abido bene bi.

¹⁷ Naiñaiño uai ote:

—Inidicue.

Jesús dinena uai ote:

—Uanai llotio. Ua inidio. ¹⁸ Cinco diga inina jai faicadio. Birui o diga itimiedi jiai o iniñede. Uanaicinona ua llotio.

¹⁹ Iemona abina uiñocaillamona, naiñaiño dinena uai ote:

—Odi Jusiñamui ie lloramadio. Iena uiñoticue.

²⁰ Cai jaiagai bai bene ite anedumo Jusiñamuina sedauidimaci. Ie jira nainomo Jusiñamuina nia

sedadica; iadedi omoi judíua; dinena raitomoi:
 “Jerusalémo Jusiñamuina cai sedauilla”.

²¹ Jesús dinena dane uai ote:

—Cuen a ñno. Jiairuido bai bene ite anedumo
 cai Moona sedañeitomoi. Jerusalémo naimiena
 jiai sedañeitomoi. ²² Raise uiñoño Jusiñamuina
 biruido sedadomoi; iadedi cai nairaimona cai
 Jilloitaraima illa jira, naimiena raise uiñuana
 sedadica. ²³ Jiairuido, ua birui, cominidi:
 “¿Ñinomo Jusiñamuina sedaitica?” railamo
 comeciaina facañeitimaci. Naimaci comeciai
 jitaillamona, naimaci illanomo Jusiñamuina
 ua sedaitimaci. Naie isoide comini naimiena
 sedajana Jusiñamui jitaide. ²⁴ Jusiñamui comeñede.
 Naimiedi jafaici. Omoi comeciai jitaillamona
 naimiena omoi sedajana jitaide.

²⁵ Riño uai ote:

—Cai Jilloitaraima billena uiñotícue. Naimiedi
 Cristo. Naimie bia, nana bie isoide rafuena caina
 raise uiñotaite.

²⁶ Jesús raite:

—Naimiedícue.

²⁷ Ieconi abido ridica. Riño diga Jesús ñaia jira,
 rajicaidica; iadedi: “¿Buena naiñaiño jitaide?”
 railano jicanoñedica. “¿Buena ñaitomíco?” rail-
 lano jiai jicanoñedica. ²⁸ Ie lleroda pozo ecimo
 rananocaida, Jesús llua isoi, naie facaise naiñaiño
 ie nairaimo abido jaide. Nainomo abido rillanona,
 naiñaiño cominimo llote:

²⁹ —Ailli pozo fuemo cue jaca cioiraininamie
 diga dafaifidícue. Nana cue finouiga rafue diese
 cuemo llote. Mai, cai jibuisailli. Naimiedi
 pozo fuemo ite. Nibai naimiedi cai Jilloitaraima.
 Naimiedi nibai Cristo.

³⁰ Ie jira Jesús dine ailluena comini bitimaci.
³¹ Naie riño ie nairai dine jailla mei, abido cai dine nia riñenia, Jesúsna raiticai:

—Maestro, mai guiño.

³² Naimie uai ote:

—Cuemo guille illana uiñoñedomoi.

³³ Coniniri siadoticai:

—Jai nibai bu ecajaibiga.

³⁴ Jesús uai ote:

—Jusiñamui cuena oretate. Naimie jitailla rafuena finocana jaidicue. Naimie rafuena cue llumona, jai guiticue isoidicue. ³⁵ Comecina facadomoi: “Jusiñamui uaina nia lloñeiticai. Ico iena lloiticai”. Ie isoide. Illimo riana nia llisiñenia, comeciaina facadomoi: “Riana einallena, naga amaga fivui fiebite. Naie facaise maijiticai”. Omoimo lloticue: Omoi ecimo eruai. Riana jai einaite isoide. Naimacimo Jusiñamui rafue llollena, iena naimaci ñollena, ailluena comini jai itimaci. ³⁶ Naie llisillamo maijitimiedi ie ucubena feiñoite. Ie isoide. Jusiñamui rafuena damerie llocabillamona, comini iena cacadimaci. Jiaino billamona, iena dane cacajamona, iena ñnotimaci. Naie mare rafue lloraini ibana feiñoitimaci. Jusiñamui dibeimo naimaci dajena maijia jira, dajena iobitimaci. ³⁷ Cai comini iena raicabitimaci: “Damie iduaina rite; ia jiaimie llisillana ote”. ³⁸ Ie isoide. Omoina oredicue, comini cue dibeimo itatallena. Naimacimo cue uaina nano lloñedomoi; iadedi nano jiaino naimacimo cue uaina llotimaci. Ie jira nana omoi llofuiamona cue uaina ñnotimaci.

³⁹ Samaria iñaiño llumona, naiñaiño nairaimona ailluena comini Jesúsna ñnotimaci.

“Naimiedi nana cue finoca rafuena cuemo lote” naimacimo naiñaño lote. “Naimiedi cai Jilloitaraïma” raillanona Jesúna ïnotimaci. ⁴⁰ Jesús dine naimaci rillanona, naimaci diga naimie fiebillena, Jesúmo jïcanotimaci. Ie jira Jesús menarui naimaci ñinomo fiebide. ⁴¹ Naimie llofuiamona, jiaie ailluena comini naimiena ïnotimaci. ⁴² Riñomo llotimaci:

—Daño o llumona, navui ïnoticai; iadedi naimie uaina cai cacajamona, birui raise ïnoticai. Naimiedi comini ua Jilloitaraïma.

⁴³ Menarui illanona, nainomona Galileamo Jesús cai diga jaide. ⁴⁴ Caïmo lote:

—Jusiñamuina lloraimadi ie nairai illanomo ia, naie comini naimie llumo cacarefiacaiñedimaci; ⁴⁵ iadedi Galileamo cai rillanona, nainomo itino naimiena caimare feiñotimaci. Pascua railla rafue facaise Jerusalémo nana naimie finoca rafue navui naimaci cïua jira, naimiena caimare feiñotimaci.

Jesúdi illaïcomini jïtona jillotaja rafue

⁴⁶ Galileamo Jesús cai diga macaria, dane Canámo ridicai. Nainomo jïnuimona vino navui finode. Nainomo cai ia, Capernaum railla nairaimo itimie jito duide. Duidimie moodi gobierno diga maijïuide. ⁴⁷ Judeamona Galileamo Jesús illana naimie fidiano, Canámo bite. Jesús illanomo billena, ie jito jai fiodiaicana jira, ie jïtona jillotallena Jesúmo duere jïcanote. ⁴⁸ Jesús naimiemo lote:

—Siño rafuena omoi cioiñenia, cuena ïnoñedomoi.

⁴⁹ Uai ote:

—Maestro, cue diga bi, cue jito fiodiañellesa.

⁵⁰ Jesús uai ote:

—Mai jai. O jito jai fioidaiñeite —llote. Naie iima Jesús uaina iñuano, ie jofomo abido jaide.

⁵¹ Naiona naimie jaidemo, ie mullaiaia diga afeedo beici dafaifide. Llotimaci:

—O jito jai jillode.

⁵² Ie jira naimie jicanote:

—¿Ñino jitoma itemo, jillode?

Uai otimaci:

—Navui are jitoma oni lluai caidemo, abi cuarilladi fañonocaido.

⁵³ Ie comecina facade: “Navui are naie fa-
caise Jesús cuemo llote: ‘O jito jai jillode’”. Ie
mullaiaia lluaña cacajamona, naimiedi Jesúsdi cai
Jilloitaraimana iñnote. Nana naimie jofomo itino
jiaia iñnotimaci. ⁵⁴ Judeamona Galileamo Jesús
abido billano, siño rafuena iese jai finode.

5

Joraibimo tisitaitimie jillua rafue

¹ Digarui illa mei, cai judíuai rafue iacana
jira, Jerusalémo Jesús abido jaide. ² Jerusalémo
toica llaudaiaia jaisoilla nase facaimo joraibi
ite. Cai judíuai uaimona nai joraibi mamecidi
Betesda. Naie jorai fuedo ite cinco jifocotiaia.

³ Nainomo diga duidino biidimaci: uisnidimaci,
ñuja-ñujacaidino, tisitaitino. Jinuina begollena
sedadimaci. ⁴ Feide isoidemona dacaiño Jusiñamui
jaenicidi jinuina begotallena bite. Iemei nai
jinuimo nano jaidimie ie duicomona jillode.

⁵ Duidino motomo tisitaitimie ite. Treintiocho
años duide. ⁶ Naimiena cuano, naimie are
duillana uiñuamona, Jesús naimiemo jicanote:

—¿Jilloiacadi o?

⁷ Duidimie uai ote:

—Jii; iadedi jinuina begoia, jaca buna iñede cue canoítena. Ie jira jiaimiedi cue uicodo jinuimo jaide. Ie jirari nia jilloñedicue.

⁸ Jesús uai ote:

—Mai naidacai. O bira ferinocaida macari.

⁹ Ieconí naimie jillode. Ie bira ferianona oni jai macarite.

Sábadoruimo duidimie jilloitajana siadua rafue

Sábadoruimo, judíuai jafaici ouillaruimo, naimie jillode. ¹⁰ Ie jira judíuai illaicomínidi jillodimie mo llote:

—Birui sábado. O bira abinocaida o uilla jira, Moisés micori rairuica rana jai finodio. Sábadomo majinidicai. Birui jafaici uaruimo jaca buena jetanidicai.

¹¹ Naimie uai ote:

—Cuena jilloitatimie cuemo llote: “O bira mai ferinocaida macari”.

¹² Judíuai dinena jicanote:

—¿Bu iena omo llote? —Naimie uiñoñena jira, uai oñede.

¹³ Jesúsdi comini motomo itabilla jira, ailluena comini illa jira, jai jillodimie ie jilloitatimien a uiñoñede. ¹⁴ Ie meinoconi dallu illanona, Jusiñamui jofomo Jesús dinena naimien a baite. Llote:

—Jai jillodio. Abido dane eo duere o sefuisa, dane jeacinona finoñeno.

¹⁵ Ie mei judíuai illaicomínimo jillodimie lluaide. Llote:

—Jesús raillamie cuena jillotate.

16 Sábadoruimo Jesús bie rafuena finua jira, judíuai illaicomínidi naimiena duere finoacasite.

17 Jesúsdi abina riiduano llote:

—Cue Moodi ie jitailla rafue jaca finode. Ie isoi cue jitailla rafue finocana jaca jaidicue —llote.

18 Sábadoruimo naimacimona Jesús maijia jira: “Jusiñamuidi cue Moo” naimie railla jira: “Jusiñamuidicue” naimie railla jira, judíuai illaicomíni naimie meinellena eo jitaídímaci.

Jesús ie Moo isoi finua rafue

19 Naimacimo Jesús llote:

—Uanaicinona lloticue. Buena dama finonidicue. Cue Moo finua rafuena cuano finocabidicue. Cue Moo finua isoi finodicue. 20 Cue Moo cuena isiruillanona, nana ie finoca rafuena cuena jai uínotade. Naimie Jitona cue illa jira, bie iimana cue jilloitaja baífemo jiaie siño rafuena finoiticue, omoi rajicaillena. 21 Fiodaitinona jilloitallena, cue Moomo ie uai ite. Naie uai cuemo jiaí ite. 22 Cue Moo juez isoi naimie ñnoñedinomo lloñeite; iadedi naimacimo juez isoi cue llollena, naimaci duere sefuillena, ie uai cuemo iga.

23 Omoi dine naimie cuena oretate. Naimiedi omoi cuena iobitajana jitaide, naimiena omoi iobitaja isoi. Cuena omoi iobitañenia, cue Moona jiaí iobitañedomoi. 24 Uanaicinona lloticue. Cue uaina bu cacaia, cuena oretatimiena bu ñnoia, monamo jaca iite. Jearede rafue naimie finua facaina duere sefuíñeite. Faiñeite; ia monamo Jusiñamui diga jaca iite. 25 Uanaicino lloticue. Jusiñamui Jitodicue. Ua birui cuena ñnoñedino cue uaina cacareitímaci. Cuena cacajamona, cuena ñnuamona, jaca iitímaci. 26 Comínina

jaca itatallena, cue Moomo uai ite. Comini jaca itatallena, cuemo ie uai jiai iga. ²⁷ Cuen a ñnoñedino juez isoi cue lollena, naimiemo cue duillamona, ie uai cuemo jiai iga. ²⁸ Ieri rajicaiño. Jai ruidi nana jai fioiditino diese cue llua na cacaitimaci. ²⁹ Fioidaillamona naimaci abiai jilloitimaci. Ie mei cue jitaillacinona finodino jaca illena lloiticue. Cue jitaillacinona finodino diese duere sefuillena lloiticue. ³⁰ Naimacimo cuena oretatimie jitailla isoi lloiticue. Dama cue comecimo ite rafuena cue lloña jira, bie lluacinodi uanaicino.

Jusiñamui ie Jito uaina comini ñnoña rafue

³¹⁻³² Jesús nia llote:

—Dama cue abina cue lloiadedi, bu cuena jaca ñnoñede; iadedi Jusiñamui cue facaina jiai llote. Naimie llucino uanaicino. Iena uiñoticue. ³³ Naimiena cacareillena, Juan Bautista micori dine cominina navui oretatomi. Abido naimaci bia, naimaci cacaja rafuena omomimo lollena, naimacina oretatomi. Juan lluacinodi uanaicino. ³⁴ Naimie micori cue rafuena llouide; iadedi naimie micori llogacinomo omoi comeci eo facajana birui jitañedicue. Cuen omoi ñnollena, naimie mamecina jai llinoticue. ³⁵ Lamparín raise lligaiña isoi, ie rafuedo Juan micori omoi comeciaino iticinona raise uiñotade. Dallu ieri iobidomoi. ³⁶ Cue finoca rafue Juan micori finoca rafue baifemo faite. Cue siño finoca rafuena ñaiticue. Cuen naimie oretajamona, cue Moo uaido iena finodicue. Ie jira naiemona naimie dinena cue billana jai uiñotomoi. ³⁷ Cue finoca rafue muidona cuena uiñotomoi; iadedi

naimie lluana jaca cacaiñedomoi. Naimiena jiai jaca cioiñedomoi. ³⁸ Cuena omoi ñnoñena jira, naimie uaina feiñoñedomoi. ³⁹ Jusiñamui dine omoi rillena, Jusiñamui facaina lloraini micoriai ciegafuiaina facacabidomoi. Naifuiaidi cuena ñaite; ⁴⁰ iadedi Jusiñamui dine omoi rillena, cue uaina ñnoiacaiñedomoi. ⁴¹ Cuemo iobillacinona omoi fecallena sedañedicue. ⁴² Jusiñamuina isiruiñedomoi. Iena uiñoticue. ⁴³ Cue Moo mamecido cue billanona, cuena feiñoñedomoi; iadedi dama ie mamecido jiaimie bia, naimiena feiñoitomoi. ⁴⁴ Jaca ñnoiacaiñedomoi. Iobillacino coninimo fecadomoi; iadedi ua Jusiñamuidi omoina “Mare” raillana jitaiñedomoi. ⁴⁵ “Cue Moomo omoi maraiñede finoca rafuena lloiticue” raillanomo comeciaina facañeno. Moisés micori ciegafuiaimo omoi llogiduafue jai ite. Moisés micori ciegafuiai muidona Jusiñamui dine omoi jaca illemo ocuridomoi. ⁴⁶ Moisés micori ciegafuiaina ñnotomoina, cuena naimie micori cuia jira, cuena jiai ñnoitomoi. ⁴⁷ Naimie ciegafuiaina ñnoñedomoi. Ie jira cuena jiai ñnoñeitomoi —llote.

6

Jesús cinco llomenicomona ailluena cominina ecaja rafue

(Mt 14.13-21; Mr 6.30-44; Lc 9.10-17)

¹ Jiairuido Galilea railla jorai ie ruica dibeimo Jesús ie llofueoicaiganodicaí diga jaide. Naie joraidi jiai Tiberiana mameciredede. ² Duidinona naimie jillotauillana naimaci cuia jira, ailluena comini naimiena racadimaci. ³⁻⁴ Naie facaiseconi

pascua railla rafuedi jai iaire ite. Jesús cai diga anedumo a jaillanona, dinomo ana raide. ⁵ Oni erodatemo, ailluena comini naimie dine billana cide. Felipemo jicane:

—Naimaci guillena, ¿ninomona llomenicon a oitica?

⁶ Naimiena facacillena, iena jicane; iadedi Jesús ie finolle rana jai uifote. ⁷ Felipe uai ote:

—Janore naimaci guillena, doscientos digarui ie maijia ucube diese llomenico oticaina, baiñede.

⁸ Naie facaise caimona damie iena cacade. Naimiedi Simón Pedro ama. Andréna mameciredede. Naimie raite:

⁹ —Cinco cebadamona finoca jenide llomenico daje uruemo bene ite. Mena lliciai jiai naimiemo ite; ia ¿niese nibaitica? Baiñeite.

¹⁰ Jesús caimo llote:

—Cominimo llono, ana imaci raillesa.

Ie jira raitire illanomo ana raidimaci. Cinco mil iifiaitimaci. ¹¹ Llomenicon a Jesús ua meinoconi, Jusiñamuimo iobillacinona fecajano, Jusiñamuimo jide. Iemei cominimo caina naie llomenicon a fecatate. Comini jitailla dierise lliciai daje isoi fecatate. ¹² Naimaci monillamona, caimo Jesús llote:

—Buena jaca faifinellena, fiebide guille danomo irai.

¹³ Ie jira iena iraidica. Naie cinco llomenicomona, comini guigamona fiebidemona, doce cirigaiaimo oruitaica. ¹⁴ Jesús finoca rafuena naie cominidi cuanona, llotimaci:

—Jusiñamui facaina lloraini micoriaidi cai jilloitaraima ico billena jaie llotimaci. Bimiedi naimie.

¹⁵ Naimacî illaïmana naimïe illena, naimïena gaitaacadimacî. Iena naimïe uiñua jira, iena naimïe jitaiñena jira, aneduaimo naimïe oni jaide.

Capernaumo Jesús abido jailla rafue
(Mt 14.22-27; Mr 6.45-52)

¹⁶ Jitoma ana itemo, jai navuidemo, ie llofueoicaiganodicai joraimo jaidicai. ¹⁷ Cai botemo cai jaillano, ruica Capernaumo jaiacadicai; iadedi Jesús nia biñede. Jesúsna sedadicaimo, naimïe biñena jirari, jai jitirena facaiseconi jai jaidicai. ¹⁸ Riire aifi illa jira, jorai eo bagode. ¹⁹ Nibai cinco, nibai seis kilómetros jaidicaimo, damïe cai dine jinui emododo billana ciodicai. Bote dine naimïe billana ciuanona, jacinaiticai. ²⁰ Jesús caïmo llote:
—Jesúdicuesa. Jacinaiñeno.

²¹ Iena cacajanona, botemo naimïena a billana jitaidicai. Ieconï ruica dine cai jaiacananomo ridicai.

Comini Jesúsna jenua rafue

²²⁻²⁴ Cai jailla mei, daje bote nairuido illa jira, jinafomo fiebidino Jesús cai diga jaiñenana uiñotimacî. Cai Nama ie Moomo iobillacinona fecajanomo, cominimo guille fecajanomo, Tiberiamona dajerie botes naie facaise iaïre bite. Monaidemo, Jesúsna naimacî cioiñena jira, cai jiaï iñena jira, naie botiaido Capernaumo Jesúsna jenollena, jaidimacî.

Jesús: “Llomenicodicue” railla rafue

²⁵ Ruica dine Jesúsna comini baïllanona, jïcanotimacî:

—¿Niruido bene ridio? ²⁶ Jesús uai ote:

—Navui are omoina cue ecajamona, iemona omoi monillamona, cuena jenodomo. Siño rafuena cue finuana ciodomoi; iadedi cuena nia inoñedomoi. ²⁷ Guille raire cueicabide. Cueiruide ramo comeciaina eo facañeno. Cueiruiñede ramo comeciaina eo faca. Jusiñamui diga omoi jaca illemo comeciaina eo faca. Cue Moo Jusiñamui, iimana cue jaillena, cuena oretate. Ie uai cuemo illanona, cue uaina omoi inuamona, Jusiñamui diga jaca iitomo.

²⁸ Jicanotimaci:

—Nia Jusiñamui dibeimo iticaina, ¿nie isoidifue finodicaina mare?

²⁹ Jesús uai ote:

—Naimie oretagamie uaina omoi inuana jitaide.

³⁰ Naimaci dinena dane jicanotimaci:

—¿Nie isoide rafuena finoitio? iena cai ciuano, o uaina cai inollesa. ³¹ Cai jaiagai jofue inenanomo Jusiñamuimona bite guilla ra guisoidimaci. Moisés micori iena jaie cuega: “Jusiñamuimona bite guiga ra naimacimo nagarui fecauide”. Iemo jiai birui ocuridicai. Naie isoide siño rafuena o finuana jiai cioacadicai —llotimaci.

³² Jesús uai ote:

—Uanai lloticue. Moisés micori naie guiga ra jaca fecañede. Cue Moo iena fecauide. Birui naimiedi monamona bite ua llomeniconona omoimo jai feaacade. ³³ Jusiñamui feaacalle llomenico monamona jai bite. Comini iena guillamona, jaca iitimaci.

³⁴ Llotimaci:

—Nagarui caimo bie isoide llomeniconona fecu.

³⁵ Jesús uai ote:

—Llomenico guillamona iticai. Omoi llomenico isoidicue. Cuena inuamona, monamo jaca iitomoi. Cuena inotimie dane aimetañeite. Cuena isiruitimie jaca dane jiroacaiñeite. —Iese lloete; ia naimaci comeciaina ñaite. Naimaci comeciai jitaillacino naimacimo jaca illena ñaite —. ³⁶ Cuena ciodomoi; iadedi cuena inoñedomoi. ³⁷ Nana cue dibeimo cue Moo itatallinodi cuena inoitimaci. Cuemona naimacina jaca oni dotañeiticue. ³⁸ Cuena oretatimie ie jitailla rafuena finollena, monamona jai biticue. Dama cue jitailla rafuena finoiticuena biñedicue. ³⁹ Cuena oretatimiedi cue dibeimo itatallinomona buna faifillana jitañede. Jusiñamui lluaruimo fiodaillamona nana naimaci abiaina cue jilloitajana jiai jitaide. ⁴⁰ Jusiñamui Jitona cue illana bu inoia, cuena bu inoia, monamo jaca iite. Jusiñamui lolliruimo fiodaillamona naimie abina jillotaiticue. Iese cue Moo jitaide.

⁴¹ Jesúsdi: “Monamona bite llomenicodicue” railla jira, judíuai illaicomini di naimie uaina jamaillano inosiñede. ⁴² Raitimaci:

—Bimiedi Jesús. José jito. Ie moon uiañoticaí. Ie eina jiai uiañoticaí. ¿Ñiese naimiedi: “Monamona biticue” raite?

⁴³ Jesúsdi uai ote:

—Iese omoi naiñeno. ⁴⁴ Naimiena cue Moo inotañenia, bu cuena inonide. Cuena bu inoñenia, Jusiñamui lolliruimo fiodaillamona naimie abina jillotaiticue. ⁴⁵ Jusiñamuina lloraini micoriai jaie iena cuetimaci: “Jusiñamuidi nana cominina ico llofueite” cuetimaci. Birui naie rafue jai suide. Naga cue Moomo cacarefidimie, naga cue Moomona fueotimie cuena jiai inoite. ⁴⁶ Buna cue

Moona jaca cioiñede. Naimiemona cue billamona, dama cue ciua. ⁴⁷ Uanaicinona lloticue. Cue uaina ñnotimie monamo jaca iite.

⁴⁸ Jesús dane llote:

—Llomenico guillamona iticai. Omoi llomenico isoidicue. Cuen a ñnuamona, monamo jaca iitomoi. ⁴⁹ Jofue iñenanomo omoi jaiagai Jusiañamuimona bite rana guisoidimaci; iadedi fiodaitimaci. ⁵⁰ Birui jiaie guille ra ite. Monamona ite. Iena bu guia, monamo jaca iite. ⁵¹ Bie llomenicodi cue. Monamo cominina jaca itatallena, monamona biticue. Bu bie isoide llomenicon a guia, jaca iite. Bie llomenicodi cue abi. Comini facaina fiodaiticue.

⁵² Iena cacajano, judíuai illaicomini coniniri naiena siadotimaci. Raitimaci:

—¿Ñiese bimie abina riiticaí?

⁵³ Ie jira Jesús dinena raite:

—Uanai lloticue. Cue abina omoi riñenia, cue diruena omoi riñenia, cue Moo diga jaca iñeitomoi. ⁵⁴ Bu cue abina riia, bu cue diruena riia, cue Moo diga jaca iite. Fiodaillamona naimie abi iirairuimo jillotaiticue. ⁵⁵ Cue abidi ua rille. Cue diruedi ua rille. ⁵⁶ Bu cue abina riia, bu cue diruena riia, cuena nabaide. Naimiena jiai nabaidicue. ⁵⁷ Cue Moo cuena orede. Naimiedi jaca ite. Cue Moo jaca illa jira, cue jaca iticue. Daje isoide. Bu cue abina riia, cue illamona, naimie jiai iite. ⁵⁸ Bie isoide guille ra monamona jai bite. Omoi jaiagai jaiie guiga ra isoñede. Jaiie fiodaitimaci; iadedi bie guille ra birui bu guia monamo jaca iite. — Iese llote; iadedi naimie fiodaillamona, naimiena

comini ñnuamona, Jusiñamui diga naimaci jaca illena ñaite.

⁵⁹ Capernaumo judíuai ofiracomo Jesús biena llote.

Jesús diga jaisoidino naimie llwana siadua rafue

⁶⁰ Jesús diga jaisoidino naimie llwana cacajano, coniniri siadotimaci:

—Bie llua eo ñirede. Bu iena cacaiñede.

⁶¹ Jesúsdi naimaci iese siaduana uiñote. Ie jira llote:

—Cue llwana raise ñnoñedomoi.

⁶² Jusiñamuimona ñimana jaillena jai biticue. Monamo abido ico cue jaillena cioitomoina, iena jiaí níbaí raise ñnoñeitomoi. ⁶³ Cai joreño caimo illamona, iticai. Dani cai abi diga ññedicai. Ie isoide. Cue llogacino Jusiñamuimo duide. Iena omoi ñnuamona, jaca iitomoi; ⁶⁴ ia omoimona nana ñnoñedomoi —llote. Nano dofoconimona Jesúsdi naimiena ñnoñedinona uiñote. Naimiena gaitataitimiena jiaí uiñote.

⁶⁵ Jesús dane llote:

—Ie jira omoimo lloticue: Cue Moo jitaiñenia, cuena jaca bu ñnonide.

⁶⁶ Iena cacajano, Jesús diga jaisoidinomona, diga comini naimiena fainonocaidimaci. ⁶⁷ Ie jira ie doce llofueoicaiganodicaimo Jesús jicanote:

—¿Jiaí cuena fainonocaida, abido jaitomoi?

⁶⁸ Simón Pedro uai ote:

—Nama, o diga cai jaiñenia, ¿bu diga jaiticai? Jusiñamuimo cai rillena, o isoi Jillotaraíma ññede. Jiaímiemo jaca itatajaracinodi ññede. ⁶⁹ O llwana jai ñnoticai. Jusiñamui mare Jitodio. Iena uiñoticai.

⁷⁰ Jesús dane uai ote:

—Doce digamie fetocaomoi; iadedi omoimona damie Taifemo jainaiaide —llote. ⁷¹ Caimona Judas Iscariote micorina ñaite. Judas micori Jesúna gaitataiacadimie.

7

Jesús amatiai naimiena #ñoñena rafue

¹ Jiairuido Galileamo ite nairaiaimo Jesús macarite. Judíuai illaicomini naimiena meineiacana jira, Judeamo jaiñede. ² Jifocotiaiai railla rafue iaire ite. Judíuai ie rafue. ³ Ie jira Jesús amatiai naimiemo llote:

—O diga jaicabidino o finua rafuena raise cioillena, beno fañonocaida, Judeamo jai. ⁴ Bu ie mameci are soriacania, bainino maijrainina. Ie isoide. Siño rafuena o finoia, ailluena comini illa motomo iena fino.

⁵ Jesús amatiai naimiena #ñoñena jira, iese raite. ⁶ Jesús dinena uai ote:

—Jerusalémo nia jaiñeiticue; iadedi nainomo omoi jaiacalliruido omoi jai. ⁷ Comini omoina enoiñedimaci. Naimaci finoca jearede rafuena cue llua jira, cuena jaca enoidimaci. ⁸ Jerusalémo rafuemo jai. Cue jaillirui nia riñena jira, nia jaiñeiticue. ⁹ —Iese llvano, Galileamo naimie fiebide.

¹⁰ Naimie amatiai rafuemo jailla mei, Jesúsdi naimaci jinafona dama bainino jaide. ¹¹ Nai rafuemo judíuai illaicomini Jesúna jenuano baiñenano, cominimo jicanotimaci:

—¿Ninomo naimie ite? —Uiñoñena jira, comini uai oñedimaci.

12 Nainomo ailluena comini itimaci. Comini illa motomo naimiena anado siadoside. Jiaino dinena: “Naimiedi mare” raitimaci. Jiaino dinena: “Naimiedi cominina jifuate” raitimaci. 13 Judíuai illaicominina iciana comini jaciruillanona, anado siadoside. Jesúna marefodo buna ñañede.

Sábadoruimo Jesús maijia raufe

14 Jifocotiaiai railla rafue atuedo fuitemo, Jesús Jusiñamui jofomo jaillano, llofuate. 15 Illaicomini naimie llofuiamona rajicaidimaci:

—¿Ñiese naimie abi uiñote? Eo rafuena uiñotimimona jaca fueñede —raitimaci.

16 Jesús uai ote:

—Dama cuemona oñega cue llofuiacinodi. Cuen a oretatimie ie. 17 Jusiñamui jitaillacinona finoiacadimiedi ninomona cue llofuiacinona cue uana uiñoite. Jusiñamuiamona cue uana uiñoite. Dama cue comecimona cue oñenana jiai uiñoite. 18 Bu dama ie comecimona ie llofuiacinona uanona lloia, naimiedi comini naimiemo iobillacinona fecajana jitaide; iadedi bu ie oretatimiena iobitaia, uanai llote. Marañedicinona finoñede. 19 Moisés micori Jusiñamui uaina jaie llote; iadedi birui naie llogacinuaina nia raise ñnoñedomoi. Iena raise ñnotomoidena, cuena niade meineiacañedomoi.

20 Comini dinena uai ote:

—Ñibai uairitaidio. ¿Bu ona meineiacade?

21 Jesús uai ote:

—Dacaño sábadoruimo damiena jillotaticue. Ie jira cue uaina uaitatomo. 22 Sábadoruimo jai maijicabidomoi. Moisés micori iisaiai abiai diana omoimo jaie llote; iadedi naimie micori naiena

nano lloñede. Naimie micori usumatiai naiena nano llotimaci. Sábadoruimo iisana abi dellirui ia, detomoi. ²³ Moisés micori llogacinona inollena, sábadoruimo iisaiaina detomoi. Sábadoruimo iimana raise jillotaticuemo, ¿bue ñellena cue diga iciritomoi? ²⁴ Cominimo jamai eruailanona, naimacina jeare ñañeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

Jesúna comini siadua rafue

²⁵ Ie jira Jerusalémo itino coniniri siadotimaci:

—Illaicomini bimiena meineiacadimaci; ²⁶ iadedi beno marefodo naimie llofuate. Jaca buena lloñedimaci. Illaicominidi: “Bimiedi cai Jilloitaraíma” raillano nibai comeciaina facadimaci. ²⁷ Bimie ie billanona cai uiñua jira, naimiedi cai Jilloitaraímañedimie. Cai Jilloitaraíma baireia, jaca budi naimie billanona uiñoñeite —siadotimaci.

²⁸ Ie jira Jesús Jusiñamui jofomo naimie llofuiano llote:

—Cuena uiñotomoi. Ninena cue billana jiai uiñotomoi. Cue jitailla jira biñedicue; iadedi jiaimie cuena oretate. Naimiedi uanai llote. Naimiena uiñoñedomoi. ²⁹ Naimiemona cue billa jira, naimiena uiñoticue. Cuena oretate —llote.

³⁰ Ie jira illaicomini Jesúna gaitaacadimaci; iadedi naimie fiodable facaise nia riñena jira, buna naimiena gaitañede. ³¹ Nairui ailluena comini naimie uaina inotimaci. Raitimaci:

—Cai Jilloitaraíma bia, ¿ñiese naimiedi bimie baifemo jiaie rafuena finoite?

Jesúna gaitaiacana rafue

³² Fariseuaidi comini iese ñaiana cacajano, Jesúna gaitallena, Jusiñamui diga nanoca ñairainidi ailluena policiana orede. ³³ Ie jira naimacina Jesús dinena raite:

—Dallu omoi diga nia iiticue. Ie mei cuena ore-tatimie dine abido jaiticue. ³⁴ Cuena jenoitomo; iadedi cuena baiñeitomo. Cue dine binitomo.

³⁵ Ie jira nainomo ite illaicomini dani siadotimaci:

—¿Ñine jaite? ¿Ñiese naimiena baiñeiticai? Judíuaiñedinona llofuellena, jiaie eniruemo cai comini dine nibai jaite. ³⁶ ¿Ñiese naimie raite: “Cuena jenoitomo; iadedi cuena baiñeitomo?” ¿Ñiese raite: “Cue dine binitomo?” —iese siadotimaci.

Jesúdi Jusiñamui Joreña ñaia rafue

³⁷ Jifocotiaiai railla rafue fuillaruimo, ua rafue ie nairuimo, Jusiñamui jofomo itinomo Jesús ado llote:

—Bu jiroacania, cue dine bi. ³⁸ Jusiñamui facaina lloraini micoriai jaie cuela: “Naimiena inotimie comecimo jaca itatate jinui isoi iite, torafomona jinui tonooilla isoi”.

³⁹ Jesúdi iese llote; ia Jusiñamui Joreña ñaite. Jusúna inotinomo Jusiñamuidi ie Joreña ico illena ñaite. Jesús nia fioldañena jira, iena nia iñega.

Comini Jesúna dane siadua rafue

⁴⁰ Jesús lluaana comini cacajano, raitimaci:

—Jusiñamui facaina lloraini micoriai Jusiñamui facaina lloraima ico billena jaie llotimaci. “Cristo nia baireñenia, naimie biite” llotimaci. Bimiedi naimie.

⁴¹ Jiaino raitimaci:

—Naimiedi cai Jilloitaraïma. Naimiedi Cristo.

Jiaino raitimaci:

—Cai Jilloitaraïma Galileamona biñeite.
⁴² Jusiñamui facaina lloaraïma micori cueba: “Cai Jilloitaraïmadi David micori jito. Belémo David micori illanomo jeicille”.

⁴³ Ie jira daje isoi naimiemo comeciaina fa-cañedimaci. ⁴⁴ Jiaino naimiena gaitaacadimaci; iadedi buna naimiena jetañede.

Judíuái illaicomini Jesúsna ñnoñena rafue

⁴⁵ Ie mei policías naimaci illaicomini dine abido jaidimaci. Fariseuai dinena jicanotimaci:

—¿Bue ñellena Jesúsna atiñedomoi?

⁴⁶ Policías dinena uai ote:

—Naimie llofuia isoi jaca buna llofueñede. Iena jacinaillanona, naimiena atiñedicai.

⁴⁷ Fariseuai dane llotimaci:

—Cominina jifuia isoi, omoïna jiai jifueete. ⁴⁸ Cai illaicomini dinena naimiena jaca ñnoñedicai. Moisés micori llogacinodo raise jaidicai; ⁴⁹ ia Jesús llofuiana cacadino Moisés micori llogacinuaido jaca raise jaiñedimaci. Ie jira jaca faifitimacisa.

⁵⁰ Naie illaicomini mona Nicodemo raillamie ite. Naimie naïona Jesús dine navui jaide. Fariseo imie. ⁵¹ Jesúsna riïduanona, naimie llote:

—Cai einamacï llocabitimaci: “Bu duere cai finoacania, nano naimie llamo cacarefiticai. Jearede rafue naimie finuana cacareillano, naimiena duere finoiticai”. Iena cai cacaiñenia, naimiena duere finoñeiticai.

⁵² Nicodemomo llotimaci:

—Galileamona bitino isoi ñaitio. Naimie llo-fuegamiena nibai jai jaiacadio. Jaiie cuezafuiaiina

raise faca. Jusiñamui facaina lloraini micoriaidi cai nairaina Jilloitaraïma Galileamona billena jaie cueñedimaci. Bie Jesús raillamiedi cai nairaina Jilloitaraïmañedimie.

⁵³ Ie meinoconi damierie imaci jofomo jaidimaci.

8

Ie iniñede ïima diga riñodi rafuetailla ie rafue

¹ Naie facaise Jesúdi Olivos railla anedumo jaide. ² Ie areruido jitiramo Jusiñamui jofomo abido dane jaide. Ailluena comini naimie dine billa jira, naimie ana raita, naimacina llofujete. ³ Naie facaise Moisés micori llogacinona llofueraïnïmona dajerie bitimaci. Fariseuaimona dajerie jiai bitimaci. Daje riño atidimaci. Ie iniñede ïima diga naiñaiñona jai eidaïimaci. Comini illa uicomo atiano, ⁴ Jesúmo llotimaci:

—Llofueraïma, biñaiño ie iniñede ïima diga eidaïicai. ⁵ Moisés micori jaie cuega: “Bie isoidiñaiñodi nofici diga fairinoga, meinellena”. ¿Ñiese naiñaiñona o raitio?

⁶ Naimiena facacillena, naimie raise uai oñenia, naimiena llogidollena, iese jïcanotimaci. Iena cacajano, Jesús ana jitadacaida, enïruemo ie onocai diga cuete. ⁷ Naimïemo diga icaiño jïca-jïcanuano, naimie naidacaida, naimacimo llote:

—Omoïmona jeacino iñedimie naiñaiñomo nano noficiïna fairino.

⁸ Dane ana jitadacaida, enïruemo dane cuete. ⁹ Naimie lluana cacajano, dajerie jino jaidimaci. Nano eo einamacidi jino jaidimaci. Ie mei conirueni jino jaidimaci. Nana comini tuua mei,

nainomo Jesús fiebide, naie riño diga ñaillena.

¹⁰ Eruaillano naiñaiño jicanote:

—¿Ni nai o llogidotino?

¹¹ Naiñaiño uai ote:

—Jaca iñedimaci. Cuenajai
llogidoiacaiñedimaci.

Jesús uai ote:

—Jiaí ona duere finoñeiticue. Mai jai. Jeacino
dane finoño.

Jesúdi comini comeciai lligaiñua rafue

¹² Jesúdi cominina dane llofuianona, raite:

—Jeacino oni jaillena, comini comeciaina
lligaiñotícue. Cuenajaiñotímie jiredinomo jaca
iñeite. Jeacino anamo jai iñedimie Jusiñamui diga
ico jaca iite.

¹³ Fariseuai dinena uai otimaci:

—Dama o abina ñaitio. Ie jirari uanaicinona
lloñedio.

¹⁴ Jesús uai ote:

—Dama cue abina llotícue; iadedi uanaicinona
llotícue. Ninena cue billanona uiñotícue. Nine
cue jaillinona jiaí uiñotícue. Ninena cue billanona
uiñoñedomoi. Nine cue jaillinona jiaí uiñoñedomoi.

¹⁵ Abi raise uiñoño cuena jeare ñaitomoi. Iese
omoina ñaiñedicue; ¹⁶ iadedi omoina cue ñaia,
uanaicinona llotícue. Dama cue uaina omoina
lloñedicue. Cuenajaiñotímie omoina jiaí llote.

¹⁷ Moisés micori iena jiaí jaie cueba: “Menamie
daje isoi lloia, naie iaímaiaí llucinodi omoi ñnua”
cueba. ¹⁸ Cue facaina lloiena, menamie jai ite. Cue
facaina llotícue. Cue Moo cue facaina jiaí llote.

¹⁹ Fariseuai dinena jicanote:

—¿Ni o moo?

Jesúdi uai ote:

—Cuenta uifioñedomoi. Cuenta Moona jiai uifioñedomoi. Cuenta uifiotomoina, cuenta Moona jiai uifiotomoi.

²⁰ Jusiñamui jofomo ucube eenoracomo bicinona siadotimaci. Jesús fiodable facaise nia riñena jira, jaca buna naimiena gaitañede.

Jesúna comini ñnoñenia, naie jeacino diga fiodable rafue

²¹ Naimacimo Jesús dane llote:

—Ico oni jaiticue. Cuenta jenoitomoi; iadedi cuenta baiñeitomoi. Na omoimo jeacino nia itemo, fiadaitomoi. Cuenta jaillinomo jainitomoi.

²² Ie jira judíuai illacomini dinena iena siadotimaci:

—Dama ie abina meineite.

“Cuenta jaillinomo jainitomoi” Jesús railla jira, iese siadotimaci.

²³ Jesúdi uai ote:

—Jusiñamuimo ite rafuemo duiñedomoi. Naimiemo ite rafuemo duidicue. Naimie dibeimo iñedomoi; ia naimie dibeimo iticue. ²⁴ Cuenta Jusiñamui Jitonana omoi ñnoñena jira, na omoi jeacino diga fiadaitomoi.

²⁵ Jicanoside:

—¿Budío?

Jesús uai ote:

—Nano omoi motomo cuenta illamona bumiedicuenta omoína raicabiticue. ²⁶ Diga rafue omoimo lloiacadicue. Marañede rafuena omoi finuana omoimo nia lloiacadicue; iadedi omoimo cuenta oretatimie uaina dama lloticue. Nai uaidi uanaicino —llote.

²⁷ Naimiedi ie Moo Jusiñamuina llote; iadedi caicañedimaci. ²⁸ Ie jira Jesús llote:

—Cuen a omoi meinia mei, bumiedicuen a uiñoitomoí. Cue uaido dama lloñedicue; iadedi cue Moo cue llofuia uaido llocabiticue. ²⁹ Cuen a oretatimie cue diga ite. Naimie jitaille rafuena cue finua jira, cuena fañonocaiñede.

³⁰ Iese Jesús llotemo, diga illaicomini naimie uaina como ñnoiacadimaci.

Comini Taiſe anamo illa rafue

³¹ Jesúsdi naimie uaina como ñnoiacadinomo llote:

—Cue lluaña ñnocana omoi jaia, cue ua cominidomoí. ³² Uanaicinona uiñoitomoí. Ie mei jiaimie anamo dane ññeitomoí.

³³ Uai otimaci:

—Abraham micori ie uruiaidicai. Jiaimie anamo jaca ññedicai. ¿Bue ññellena llotio: “Jiaimie anamo ññeitomoí”?

³⁴ Jesúsdi uai ote:

—Uanai lloticue. Jeacino finocabidomoí. Naga jeacino finoraíma ie jeacino anamo jai ite. Omoi jeacino anamo omoi illaña ññaiticue. ³⁵ Jiaie rafuedo iena lloiticue. Ie patrón anamo itimie mo ie patrón rafuedi duiñede; iadedi naie patrón jitomo ie rafuedi duide. ³⁶ Ie isoide. Jusiñamui Jitona cue illamona, naimie rafuemo duidicue. Ie jira omoímo cue lloia, omoi jeacino anamo ua ññeitomoí. ³⁷ Abraham micori ie uruiaidomoí. Iena uiñoiticue; iadedi cue lluaña omoi raise ññoña jira, cuena meineiacadomoí. ³⁸ Cue Moo diga jaie cue illamona, cue ciua rafuena llocabiticue. Omoi moomona cacaja rafuena finocabidomoí.

³⁹ Uai otimaci:

—Cai moodi Abraham micori.

Jesús dane uai ote:

—Abraham micori uruiaidomoidena, Abraham micori finoca rafue isoi finodomoï. Abraham micori uruiaifnedomoï. Ie jira Abraham micori finoca rafue isoi finoñedomoï. ⁴⁰ Uanai cue llua jira, cuena meineiacadomoï; iadedi Abraham micori iese finoacaiñede. Cue llucino Jusiñamuimona oticue. ⁴¹ Jusiñamui uruiaifinoca rafuena finoñedomoï; iadedi omoï moo finoca rafuena finocabidomoï.

Uai otimaci:

—Jamai nairai ie uruiaifñedicaï. Cai Moodi Jusiñamui.

⁴² Jesús dane llote:

—Jusiñamuidi omoï moodena, cuena isiruitomoï, naimiemona cue billa jira. Cue jitailla jira, biñedicue; iadedi cuena oretate. ⁴³ ¿Bue ñellena cue lluana cacaiñedomoï? Cacareirainidomoï. ⁴⁴ Omoï moodi Taifena jira, cue lluana ñnoñedomoï. Naimie jitailla rafuena finoacacabidomoï. Nano dofomona naimiedi comena meineraima. Naimie taino jaca llua jira, uanaicinona naimie jaca gaiñede. Naimie tainona lloia, ie comeci llua isoi llote. Naimiemona taino llucinodi comuicabide. Naimie isoidomoï. ⁴⁵ Uanai cue llua jira, cuena ñnoñedomoï. ⁴⁶ ¿Nie isoide jeacino finodicue? Cuemo llono. Uanai cue llia, ¿bue ñellena cuena ñnoñedomoï? ⁴⁷ Jusiñamuina mooredimiedi Jusiñamui uaina cacade. Jusiñamui uruiaifñedomoï. Ie jira cue lluana cacaiñedomoï.

⁴⁸ Naimiena jearuillanona, naie illaicomini dinena iese raitimaci:

—Samaritano nairai imiedio. Janaba illamiedio. Uairitaidio.

⁴⁹ Jesús uai ote:

—Janaba illamieñedicue. Cue finoca rafuemona cue Moona iobitadicue; iadedi iese cuena omoi ñaiamona cuena iobitañedomoi. ⁵⁰ Omoimona iobillacinona feiñollena, cue rafuena finoñedicue; ia cue Moo iena oiacade. Cuena omoi iñoñenia, cuemo iobillacinona omoi fecañenia, cue Moo omoina duere finoite; ⁵¹ ia bu cue llwana ua iñoia, jaca ua fioidañeite.

⁵² Naie illaicomini dinena uai otimaci:

—Janaba illamiediona jai uiñoticaí. Abraham micori jaie fioidaite. Jusiñamuina lloraini micoriai jiai jaie fioidaitimaci; iadedi: “Bu cue llwana iñoiadedi, fioidañeite” raitio. ⁵³ Cai usuma Abraham micori baifemo faiñedio. Jusiñamuina lloraini micoriai baifemo faiñedio. ¿Bumiediota?

⁵⁴ Jesúsdi uai ote:

—Dama cue abina biriñedicue; ia cue Moo cuena marena ñaiamona, cuena iobitate. “Cai Moodi Jusiñamui” raicabitomoi; ⁵⁵ iadedi naimiena uiñoñedomoi. Naimiena uiñoticue. “Naimiena uiñoñedicue” cue raia, omoi isoi taino lloticue. Naimiena uiñoticue. Naimiena jiai iñoticue. ⁵⁶ Omoi usuma Abraham micori enruemo cue ico billena jaie uiñote. Iena uiñuamona, naimie iobide.

⁵⁷ Illaicomini dinena uai otimaci:

—Odi cincuenta años nia iñedio. ¿Niese Abraham micorina cioidio?

⁵⁸ Jesús uai ote:

—Abraham micori nia iñena facaiseconi jaca iticue.

⁵⁹ Iena cacajanona, naimie fairinollena, naie illaicomini noficina llinotimaci; iadedi Jesús reirillanona, Jusiñamui jofomona oni jaide.

9

Jesús uisnidimiena jillotaja rafue

¹ Jiairuido ie llofueoicaiganodica; diga Jesús macaria, uisnidimiena ciode. Iese nanomona jaca naimiedi jeiciga. ² Jesús mo jicanotica:

—Llofueraima, ¿bue ñellena naimiedi iese jeiciga? ¿Nie isoide ra ie moo jetajamona, naimie iese jeiciga? ¿Nie isoide ra ie ei jetajamona, naimie iese jeiciga? Caimo llono.

³ Jesús uai ote:

—Naimie jeacino finua muidonañede. Ie moo muidonañede. Ie ei muidonañede. Jaca bue jetajamona, iese comuiñede. Jusiñamui uai siñonana comini uinollena, iese jeiciga.

⁴ Nia userena jira, cuena oretatimie ie jitailla rafuena finoacadica; Raie jitirenite. Ie mei bu jaca maijinite. ⁵ Eniruemo cue nia ia, comini comeciaina lligaiñoticue. —Iese Jesús llote; iadedi jiaie rafuena ñaite. Naimie nia fiodañenia, Jusiñamui rafuena llocana naimie jaillana ñaite. Ie fiodaillirui jai iaire iacanana ñaite. Comeciaina lligaiñuana llote, jeacino oni jaillena.

⁶ Iena lluanona eniruena tuajano, enirue idiai finuanona, uisnidimie uisina naie enirue diga riginote. ⁷ Raite:

—Siloé railla joraibimo mai noisai —raite. Siloé oni dobaiñuamona: “Oretarabi”.

Ie jira naimie noisaide. Uisi jai ciodemo, abido bite. ⁸ Billa mei, naimie ecimo itino, jiai naimiena ciocabidino diga, naimie jilluana coniniri siadotimaci:

—¿Buuta naimiedi? Bene ucube jicallena raicabidimie isoide.

⁹ Jiaino raitimaci:

—Jii, naimie.

Jiaino raitimaci:

—Ieñede. Naimiena eruaide isoide.

Naimie dinena raite:

—Uisinidimiedicue; iadedi jai ciodicue.

¹⁰ Naimiemo jicanotimaci:

—¿Niese jai birui ciodio?

¹¹ Uai ote:

—Jesús raillamie enirue idiai finuano, cue uisina riginote. Cuemo llote: “Siloé railla joraibimo noisai”. Ie jira noisaidicue. Jai ciodicue.

¹² Jicanotimaci:

—¿Ninomo ite nai Jesús?

Naimie uai ote:

—Uiñoñedicue.

Comini uisinidimie jai jilluana siadua rafue

¹³ Navui uisinidimie jai jillua mei, fariseuai dine comini naimiena uitimaci. ¹⁴ Sábadoruimo Jesúdi naimiena jillotaja jira, ¹⁵ fariseuai naimiemo jicanotimaci:

—¿Niesenamona jai ciodio?

Uai ote:

—Jesús raillamie enirue idiai finuano, cue uisina riginote. Ie mei Siloé railla joraibimo noidicue. Iemona jai ciodicue.

¹⁶ Fariseuaimona jiaino raitimaci:

—Sábadoruimo bimiena Jesús jillotaja jira, caimona jai maijide isoide. Jesús maijia jira, Jusiñamuimona naimie biñede.

Jiaino raitimaci:

—¿Niese jearede ra finuidimiedi uisnidimiena jillotate? —Ie jira daje isoi comeciaina facañedimaci.

¹⁷Ie jira navui uisnidimie mo dane jicanotimaci:

—Naimie ona jillotaja jira, ¿niese odi Jesúna raitio?

Uai ote:

—Naimiedi Jusiñamui uai lloraima.

¹⁸Naimie moo, naimie ei iaimaiaimo nia jicanoñenia, judíuai illaicomini nai ima jaca cioñenano inosiñede. Ie jira iaimaiaina uaiduanona, ¹⁹jicanotimaci:

—¿Bimiedi omico jito? ¿Naimie jaca uisnino jeiciga?

²⁰Uai otiaimaia:

—Jii, bimie coco jito. Jaca uisnino jeiciga. Iena uiñoticoco. ²¹Niese jai naimie uisina ciuana uiñoñedicoco. Bu naimiena jilloitajana jiai uiñoñedicoco. Naimie mo jicano. Naimiedi jai eimesa. Dama ie facaina jai ñaite —uai otiaimaia.

²²Bie rafue nia suiñenia, judíuai illaicomini navui llotimaci: “Jesúdi cai Jilloitaraima bu lloia, cai ofiracomo naimiena fo billana rairuitica”. Iena jaciruillanona, ²³llotiaimaia: “Naimie jai eimesa. Naimie mo jicano”. ²⁴Ie jira illaicomini dane naimiena uaiduano, llotimaci:

—Jusiñamuimo iobillacinona feca. Jesúmo fecaño. Naimie jearede rafuena finuidimiena uiñotica.

²⁵ Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidi ciorainidicue. Birui jai ciodicue. Iena uiñoticue.

²⁶ Jicanotimaci:

—¿Niesede ra diga finuamona odi uisina ciodio? ¿Niese ona jillotate?

²⁷ Uai ote:

—Omoimo jai lloticue; iadedi cacaiacaiñedomoi. ¿Bue ñellena omoimo dane lloiticue? ¿Ie llofueganona jaiacadomoi?

²⁸ Raire uai otimaci:

—Naimie ie llofuegamiedio. Caidi Moisés micori ie llofueganodicai. ²⁹ Jusiñamui Moisés micorimo jaie lluaa uiñoticaí; iadedi bimiena uiñoñedicai. Naimie ninena billana jiaí uiñoñedicai.

³⁰ Nai iima uai ote:

—Jadi, naimie ninena billana uiñoñedomoi; iadedi cuena jillotate. ³¹ Jusiñamuidi jearede rafuena finodino ñaia uaina cacareñede. Naie isoidino siño rafuena finoñenana uiñoticaí; iadedi Jusiñamuidi naimiena sedadimie ñaia uaina cacade. Ie jitailla rafuena finodimie ñaia uaina cacade. Naie isoidino siño rafuena finuana uiñoticaí. ³² Enirue finua facaisemona jaca buna uisino jeicigamiena jilloitañede. ³³ Jesúsdi Jusiñamuimona biñedimiedena, jaca buena finonide.

³⁴ Uai otimaci:

—Jamai cai nairai imiedio. ¿Niese caina llofueitio?

Ie jira naimaci ofiracomona naimiena jino dotadimaci.

Jesús uisindimie diga ñaia rafue

³⁵ Uisínidimiena jino dotajana fidianona, Jesús naimiena jenode. Baillano, jicánote:

—¿Omoi cominina Jilloitaramana ñnotio?

³⁶ Uai ote:

—¿Bumai naimie? Cuemo llono, naimiena cue ñnollesa.

³⁷ Jesús uai ote:

—Naimiena ciodio. O diga ñaite. Cue.

³⁸ Caiñici ifodo rainadajanona, iobillacinona fellena, uai ote:

—Nama, jai o uaina ñnoticue.

³⁹ Jesús uai ote:

—Uisínidino cioitallena, eniruemo biticue. Jai uisina ciodino uisina cioitañellena biticue. —Iese Jesús raite; ia naimaci comeciaina ñaite. Jesús “Jai marañedicaí” raitinona jillotajaibite. Jesús “Jai maredicaí” raitinomo ite jeacino naimaci uiñollena bite.

⁴⁰ Naimie ecimo ite fariseuai iena cacajano, jicanotimaci:

—¿Uisínidomoi caina raitio?

⁴¹ Jesús uai ote:

—Uisínidino isoi itomoina, omoimo ite jeacino omoi muidonañede; ia “Jai ciodicaí” omoi railla jira, omoimo ite jeacino omoi muidona.

Iese raite; ia naimaci comeciaina ñaite. Jeacino naimacimo illana naimaci uiñoiacañena jira, iese ñaite. Naimaci jeacino oni dotajana jitaiñedimaci.

10

Toica llaudaíai sedaraima rafue

¹⁻² Jesús dane llofue:

—Cue rafuena omoi raise uiñollena, toica llaudaiaina ñaiticue. Llaudaiaia jino uicabilla isoi, llaigafomo nasedo fo jaidimiedi naie llaudaiaia sedaraima; ia jinofebai dinena bitimiedi firiraima. ³ Llaigafu llaudaiaia sedaraima fo jaillena, nase sedaraimadi nase econote. Llaudaiaia naimie uaina uiñotimaci. Imaci mameciaido uaiduamona, llaigafomona jino bitimaci. ⁴ Nana ie llaudaiaia jino bia, naimacina ifode. Naimie uaina uiñuanona, naimiena racadimaci. ⁵ Naimaci uiñoñegamiena racañedimaci; iadedi naimie uaina naimaci uiñoñena jira, naimiemona oni aisidimaci.

⁶ Bie isoidicinona Jesús llofujete; iadedi naie comini iena cacañedimaci. ⁷ Ie jira Jesús dane llofujete:

—Llaigafu ie nase isoidicue. ⁸ Damierie firirainina bitimaci. Ie jira llaudaiaia naimaci uaina cacañedimaci. —Iese Jesús llofujete; ia naimiena inotinona ñaite. Naimiena abi caitadinona ñaite. Naimie inotino naimiena abi caitadino llogacinomo cacarefiñena ñaite. ⁹ Nia llofujete:

—Llaigafu isoidicue. Bu cue nasedo fo bia, jilloite. Llaudaiaia isoi fo biite. Jino jaite. Mare guille baite isoite. —Iese llofujete; ia naimiena inotino marena illana ñaite. Naimiemona naimaci jitailla rafuena uana ñaite. ¹⁰ Nia llofujete:

—Llaudaiaina fillena, meinellena, faifillena, firiraima bite; iadedi cominina jaca raise itatallena, biticue. ¹¹ Llaudaiaia marena sedaraimadicue. Mare sedaraimadi ie toinaia facaina riduanona ie abina faifite. ¹² Janallari bia, llaudaiaia naimie ieñena jira, jamai maijidimiedi,

llaudaiaina fañonocaillano, ecimona aiside. Llaudaiaina janallari gaitaacanamona, llaudaiai tuudimaci. ¹³ Jamai ucube oiacanano, isiruiñenano, jamai maijidimie aiside. ¹⁴ Iese iñedicue. Mare sedaraimadicue. Cue llaudaiaina uiñoticue. ¹⁵ Cue Moo diga conimana coco uiñua isoi, naimaci cuena jiai uiñotimaci. Cue llaudaiai facaina fiodaiticue. —Iese Jesús llofuate; ia naimiena ñnotinona ñaite. Jamai maijidimie isoi naimacina sedañede. Naimacina raise riidote. Naimaci facaina jiai fiodaiacade. ¹⁶ Nia llofuate:

—Jiaie llaigafomo jiaie llaudaiai cuemo ite. Naimacina jiai atiacadicue. Cue uaina cacaitimaci. Ie mei danomo nana cue llaudaiai iitimaci. Naimacina dama sedaiticue. —Iese Jesús llofuate; ia jiaie nairaiaimo naimiena ñnoitinona ñaite. Dajena naimacina sedajana ñaite.

Jesús fiodaille rafue

¹⁷ Jesús nia llofuate:

—Cue jai fiodaiacanamon, cue Moo cuena isiruite. Fiodaillamon, dane jilloiticue. ¹⁸ Cue jitañenia, jaca buna cuena meineñeite. Cue jitailla jira, fiodaiticue. Siño uai cuemo illa jira, cue jitailliruimo fiodaiticue. Cuemo cue Moo siño uaidi jai illa jira, dane jilloiticue.

¹⁹ Jesús iese llofuaia jira, judíuai illaicomini daje isoi comeciaina facañedimaci. ²⁰ Jainodi:

—Naimiemo Janaba illamie —raitimaci—. Uairico. Naimiena cacareiacañedicai —raitimaci.

²¹ Jaino raitimaci:

—Bie isoidicinona Janaba illamie llofueñede. Janaba illamie uisidimiena jillotanide.

Jesús ie Moo diga daje isoi comeci lloilla rafue

22 Rollime facaise Jerusalémo Jesús ite. Naie facaiseconi Jusiñamui jofo ie finua comecia rafue ite. 23 Salomón micori finotaga jofo abi ibirimo Jesús macarite. 24 Naie facaise judíuai illaicomini naimie dine bitimaci. Jicanotimaci:

—¿Niruido caimo ona lloitio? Odi cai Jil-loitaraimania, caimo marefodo llono.

25 Jesús uai ote:

—Omoimo jai lloticue; iadedi ñnoñedomoi. Cue Moo mamecido cue finoca rafuemona cuena uiñotomoi. 26 Cue toica llaudaiaimo omoi jainaiañena jira, cuena ñnoñedomoi. 27 Cue toica llaudaiai cue uaina cacadimaci. Naimacina uiñoticue. Cuena racadimaci. 28 Naimaci jaca itataticue. Jaca abina faifiñeitimaci. Cue anamona jaca budi naimacina bairoñeite. 29 Cue Moo naimacina cuemo fecade. Naimacidi jaiño baiñemo faitimaci. Naimiemona jaca budi naimacina baiñonide. 30 Cue Moo diga daje isoi comecina lloidicoco. —Iese llote; ia naimiena ñnotinona ñaite. Naie illaicomini naimiemo jainaiañena jira, naimiena ñnoñedimaci. Iena Jesús ñaite.

31 Jesús llofuiana cacajano, naie illaicomini noficina llinotimaci, naimiena meinellena. 32 Iena cianona, Jesús llote:

—Cue Moo uaido diga mare rafuena finodicue. ¿Ñie isoide rafuena cue finua muidona, cuena meineiacadomoi?

33 Uai otimaci:

—Mare rafuena o finua muidona, ona meineñeiticai. Jamai ñimadio. “Jusiñamuidicue” o raila jira, ona meineiticai. Jusiñamui Joreña jia jeare ñaitio.

34-36 Jesús d̄inena uai ote:

—Jaie cuegafuiaina jamainidicaí. Nainomo Jusiñamuidi naimie uaina cacadinomo jaie llote: “Omoidi jusiñamuillaídomoi”. Jusiñamui ie uaina cacadinomo jaie iese lloiade, ¿niese cuena jeare ñaitomoi? Jusiñamui cuena fetuano, cuena bene oretate. “Jusiñamui Jitodicue” cue railla jira, “Jusiñamui Joreñona jeare ñaitio” raitomoi. ³⁷ Cue Moo isoi cue finoñenia, cuena ñinoñeno; ³⁸ iadedi cuena omoi ñinoiacaiñenia, cue Moo isoi cue finoia, naie rafuena ñino. Iemei cue Moomo cue jainaiaillana uiñoitomoi. Cuemo cue Moo jainaiaillana jiaí uiñoitomoi.

³⁹ Iena cacajano, naimiena dane gaitaacadimaci; iadedi naimacimona jillode.

⁴⁰ Ie mei Jesús Jordán railla ille ruica dibeimo jaide. Nainomo Juan micori cominina nano bautizade. Nainomo rillanona, nainomo Jesús fiebide.

⁴¹ Ailluena comini Jesús dine bitimaci. Coninina raitimaci:

—Juan micori siño rafuena finoñede; iadedi nana Juan micori Jesúsna llucinodi uanaicino.

⁴² Nainomo ailluena cominidi Jesús naimaci jil-loitaraimana ñnotimaci.

11

Betaniamo Jesús abido jailla rafue

¹ Naie facaise Betaniamo Lázaro raillamiedi duide. Naimie miriñodi Marta, María iaíñuaí.

² Naie Maríadi jiairuido Jesús eillimo caimare soride rana totade. Ie mei naiñaiño ie ifotie diga naimie eillina safenaillena dote. ³ Naie

iaifñuai Jesús dine uaina orediaifñuai, naimie bil-
lena. Naimie jibuisaibillena llotatatiiaifñuai:

—Nama, o isiruigamie duide —lloatatiaifñuai.

⁴ Jesús naie rafuena fidiano, lloate:

—Jamai fiodaillena naimie duiñede. Jusiñamui
uaina siñonana comini uifñollena, naimie duide.
Iemona comini dinena: “Ua Jusiñamui Jitodio”
cuenta raitimaci.

⁵ Jesúsdi Lázarona isiruite. Ie miriño iaifñuaina
jiaifñuisiruite; ⁶ iadedi Lázarodiuillana Jesús fidiano,
naimie dine jaiñede. Naimie illanomo menarui nia
fiebide. ⁷ Ie mei ie llofueoicaiganodicaimo lloate:

—Judeamo abido dane mai caifñailli.

⁸ Uaifñoticaifñai:

—Llofueraima, judifñuafñai illaicomini birui noficina
ona fairinoiacadimaci. ¿Niese naimiacifñai dine dane
jaitio?

⁹ Uaifñote:

—Nagarui userede. Userenia bu macaria, raise
ciafñajira, eicaitañede; ¹⁰ iadedi bu naiona macaria,
raise cioifñena jira, eicaitaide. —Iese llofujete; ia
naimie rafuedo jaillena ñaite. Raite:

—Cue rafue suicana jaite. Cue jitaille dinori
nia llofueticue. Cue rafuedo omoifñajia, marena
jaitomoi. Iedo omoifñajiaifñenia, duere sefuitomoi.

¹¹ Dane lloate:

—Lázaro jai ifñide; iadedi naimiena casitallena,
jaiticue.

¹² Uaifñoticaifñai:

—Nama, naimie jamai ifñia, nia dama casite.

¹³ Naimie jafaicifñai uanona ifñiamo comeciaina fa-
cadicaifñai; iadedi Jesús naiena lloñede. Lázaro fiodail-
lana ñaite. ¹⁴ Ie jira Jesús caimo marefodo lloate:

—Naimie jai fiodaite. ¹⁵ Nainomo cue iñena jira, cue siño uai omoi ñnollena, omoi facaina iobidicue. Naimie dine mai cai jailli.

¹⁶ Caimona Tomás caimo llote:

—Maiña. Naimie diga fiodaisaiticai —llote. Tomás mameci jiaicidi Dídimó. Naimiedi gorasa.

Jesús Marta diga ñaia rafue

¹⁷ Betaniamo cai ria, Lázaro raiafomo jai na-gaamagarui illana fididicai. ¹⁸ Jerusalémona Betaniamo tres kilómetro dñori illa jira, ¹⁹ diga judíuai illaicomini eedollena, Marta iaíñuai María dine bitimaci. ²⁰ Jesús billana Marta fidiano, cai dine naisomo bite; iadedi jofomo María fiebide.

²¹ Jesúmo Marta llote:

—Nama, o bene itiona, cue ñio fiodañede;

²² iadedi Jusiñamui buena o jicaia, naimie iena finoite. Iena uiñoticue.

²³ Jesús ñinena uai ote:

—O ñio abido jilloite.

²⁴ Naiñaiño uai ote:

—Nana comini jilloilliruimo naimie jiaí jilloite. Iena uiñoticue.

²⁵ Jesús uai ote:

—Fiodaillamona comini abiaina Jilloitaraimadicue. Jusiñamui diga jaca illena, cominina itataraimadicue. Bu cuena ñnuanona, fiodaiadedi, iemona ico jilloite. ²⁶ Cuenan ñnotimiena Jusiñamui illanomo jaca illena itataiticue. ¿Iena ñnotio?

²⁷ Naiñaiño uai ote:

—Ji, Nama; odi cai Jilloitaraimadio. Odi Jusiñamui Jitodio. Jusiñamui ñinena o billamo jaie ocuridicai.

28 Iese raillanona, jofomo Marta abido jaide. Ie euiñona uaiduano, anado llote:

—Llofueraima jai ride. Ona uaidote.

29 Iena cacajano, raire cai dine María bite.

30 Marta diga ie ñaianomo Betania ecimo Jesús nia ite. 31 Jesús dine María nia jaiñenia, judíuai illaicomini María nia eedotimaci. María jino jaillana ciuano, racadimaci. “Raiafomo eellena naiñaiño jaide” raillanona comeciaina facadimaci.

32 María Jesús dine rillano, naimiena duenaillano, caiñici ifodo rainadacaida, llote:

—Nama, bene itiona, niadedi cue iiodi fiodaiñede.

Jesús Lázaron a jillotaja rafue

33 María eiana Jesús ciuano, naiñaiño diga bitino eiana ciuano, naimie comeci eo sunaite. Sunaillanona, jafaicina faite. 34 Jicanote:

—¿Ninomo Lázaron raitomoi?

Uai otimaci:

—Nama, mai jibuisaibi.

35 Lázaron duenaillanona, Jesús eede. 36 Iena ciuanona, judíuai illaicomini dinena llotimaci:

—Ero. Naimiena eo isiruite.

37 Jiaino raitimaci:

—Navui uisinidimiena jillotate. ¿Bue ñellena bimiena jilloitañede, naimie nia fiodaiñenia?

38 Iena cacajanona, ie siño uai finuana naimaci nia raise inosiñena jira, Jesús comeci dane sunaite. Oni jaillanona, raiafomo ridicai. Nofici motomo ite naie raiafo. Ifodi jiaie noficina ibaica. 39 Jesús llote:

—Nofici oni ñuita.

Marta dinena naimie uai ote:

—Nama, naimie abi jai sorirede. Nagaamagarui raiafomo jai ite.

⁴⁰ Jesús uai ote:

—Cuenta o ñnoia, Jusiñamui uai siñonana uiñoitio.

⁴¹ Iemona cominidi noficina oni ñuitadimaci. Jesús monamo eruaillano, llote:

—Moo, cue uaina o cacaja jira, iobidicue. ⁴² Jaca cuenta cacadio. Iena uiñoticue; iadedi cue diga bene itino illa muidona, iese ado lloticue. Cuenta o oretajana naimaci ñnollena, o diga ado ñaiticue.

⁴³ Ie mei eo ado llote:

—Lázaro, jino bi.

⁴⁴ Nai fioidaitimie nia naimie abi nana ferinua ra diga jino bite. Jesúsdi cominimo llote:

—Naimie abi ferinua oni suiño. —Ie jira suiñodimaci.

⁴⁵ Ie muidona María diga bitinomona ailluena comini Jesúsna ñnotimaci. Naimie finoca rafuena ciuanona, ñnotimaci.

Jesúna meinellena, illaicomini comeciaina facaja rafue

(Mt 26.1-5; Mr 14.1-2; Lc 22.1-2)

⁴⁶ Jesúsna ñnoñedinomona damierie Jesús finoca rafuena fariseuai dine lluidimaci. ⁴⁷ Ie jira Jusiñamui diga nanoca ñairaini, fariseuai diga, danomo ofidimaci. Jesús rafuena siadotimaci:

—¿Niese naimiena nibaiticai? Diga siño rafuena ua finocabide. ⁴⁸ Naimiena niese cai nibaiñenia, nana comini naimiena ñnoitimaci. Nana comini naimie dibeimo jia, naimaci illaimana naimie jaillana jitaitimaci. Iemei romanos soldaduai biitimaci. Jusiñamui jofona judaiaibitimaci. Cai nairaiaina jiaí fuidoitimaci. Iena jitaíñedicai.

49 Naie facaise nanoca Jusiñamui diga ñairaimana Caifás illamona, naimacimo lloste:

—Naimie rafuena raise uiñoñedomoi. ⁵⁰ Iese cai nairaimo suiñellena, damie cai nairai facaina fiodaitena, mare. Iena nibai nia raise uiñoñedomoi.

⁵¹ Ie comecina dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimiena buena llotatate:

—Jesúdi cai comini facaina fiodaite.

⁵² Cai comini facaina dama fiodañede; iadedi nana Jusiñamuina inoitinona facaina fiodaite. Diga nairaimo itimaci; iadedi naimiemo dajena nana naimaci duillena, naimie fiodaite. ⁵³ Caifás llua naimaci cacajamona, judíuai illaicomini comeciaina nia facadimaci, naimiena meinellena.

⁵⁴ Ie jira Jesús judíuai illaicomini illa motodo marefodo macariñede. Jofue iñena dofodo jaidicai. Efraín railla nairai dine ridicai. Nainomo diga irui iticai. ⁵⁵ Pascua railla rafue iaie iacana jira, ailluena comini Jerusalémo naimaci nairaimona jaidimaci. Rafue nia taineñenia, naimacimo ite rafue oni jaillena, cai einamací llua isoi finodimaci. ⁵⁶⁻⁵⁷ Jusiñamui diga nanoca ñairainidi fariseuai diga navui ñaitimaci:

—Bu Jesúsna cioia, naimiena cai gaitallena, caimo llono.

Rafuemo bitino illamona, Jesúsna jenodimaci. Jusiñamui jofomo naimaci ia, coninimo jicanododimaci:

—¿Niese comeciaina facadomoi? ¿Jesús bene biite? Cai illaicomini llua jira, nibai jai biñeite. Illaicomini llua fidiario, naimie biñeite.

12

Betaniamo Lázaro jofomo Jesús guilla rafue (Mt 26.6-13; Mr 14.3-9)

¹ Pascua railla rafue rilledi seis digarui fiebidemo, Jesús cai diga Betaniamo jaide. Betania Lázaro illano. Jesús Lázaron a fiodaillamona navui jillotata. ² Jesúri iobillano, Lázaro ie guille rafuena finode. Marta guille bai jonega. Jesús diga guitino motomo Lázaro ite. Jesús llofueoicaiganodicaidi jiai motomo guiticaí. ³ Iemei Mariadi nardomona finoca caimare soride ra Jesús eillimo totade. Daje botella raifi totade. Safenaillena naiñaiño ifotie diga ie eillina dote. Nai caimare soride ra eo raifide. Daje botella ite. Iemona nana jofojeraidi soride. ⁴ Caimona Judas Iscariote micorina mameciredimie ite. Jesúna gaitataitimie. Llote:

⁵ —¿Bue ñellena bie soride radi fecañede, ucubena ollena? Fecacadena, trescientos digarui maijia ucube diese raifide. Ie mei nai ucube dueredinomo fecadena, mare —llote. ⁶ Dueredinona naimie duenaiñede; iadedi naimie cai ucubena sedade. Naimiedi firiraima. Naie ucubemona fiuilla jira, iese naimie llote.

⁷ Jesús uai ote:

—Dama ite. Bie soride ra naiñaiño jai eenoga cue fiodaillirui iena. ⁸ Dueredino omoi diga jaca iitimaci; iadedi omoi diga jaca iñeiticue.

Ailluena comini Lázaron a ciua rafue

⁹ Lázaro jofomo Jesús illana ailluena cai illaicomini fidiano, bitimaci. Navui fiodaillamona Lázaron a Jesús jillotaja jira, Jesúna dama cioiacaiñedimaci; iadedi Lázaron a jiai

cioiacadimaci. ¹⁰ Ie jira Jusiñamui diga nanoca ñairainidi Lázaron a jiaí meinellemo comeciaina facadimaci. ¹¹ Lázaro muidona ailluena judíuai illaicomini naimaci illa díbei faionocaida, Jesúna ñinotimaci.

Jerusalémo illaíma isoi, Jesús marena jailla rafue (Mt 21.1-11; Mr 11.1-11; Lc 19.28-40)

¹² Pascua railla rafue illa jira, ailluena comini Jerusalémo itimaci. Egiptomona cai jaiagai jillobil-lana comecillena naie rafue ite. Jesús Lázaro diga guillarui ie areruido Jesús Jerusalémo billana naie comini fididimaci. Fiodaillamona Lázaron a Jesús navui jilloitajana diga comini cioidimaci. Iena llocana uitimaci. Ie jira ailluena comini Jesús dine jaidimaci. ¹³ Raforona uanona, naimiena feiñollena, naimie uicomo jaidimaci. Ado cuiriisite: —¡Cai Jilloitaraíma billa! ¡Jusiñamui mamecido bitimie eo mare! ¡Cai Illaíma eo mare! —cuiiriisite.

¹⁴ Jesúsdi ailli baiga burrito emododo jaide. Jusiñamui facaina lloraima micori jaie lua isoi jaide. Jaie llote: ¹⁵ “Jerusalén imaci, jacinaiñeno. O Illaíma burrito emododo biite”. ¹⁶ Naie facaise bie rafuemo comeciaina facañedicai; iadedi Jesús jillua mei, bie rafuena comecitícai. ¹⁷⁻¹⁸ Lázaron a Jesús jillotaja jira, ailluena comini Jesús dine jaidimaci. ¹⁹ Iena ciuano, fariseuai coniniri ñaitimaci:

—Jaca buena birui finoñedicai. Ailluena comini Jesús díbeimo jai jaidimaci.

Judíuaiñedino Jesúna cioiacana rafue

²⁰ Judíuaiñedino Jusiñamuina sedallena, pascua railla rafuemo jiaí bitimaci. ²¹ Naie facaise cai dine

bitimaci. Felipedí Galilea ie Betsaida nairai imiena jira, Felipe dine bitimaci. Felipemo llotimaci:

—Jesúna cioiacadicaí.

²² Felipe iena Andrémo llote. Ie mei Jesúmo lluidiaímaiaí. ²³ Jesús uai ote:

—Monamona biticue; ia jai cue fiodaille facaise ride. Comini cue uaidí siñonana uíñua facaise jai ride. ²⁴ Jiaie rafuedo iena lloiticue. Ido rilla mei, naie ido sicoñenia, buena iñede; iadedí sicuamona, ailluena llisilladí iite. Ie isoide. Cue fiodaiñenia, jaca bu jillobiñeite. Cue fiodaillemona ailluena comini jillobitimaci. ²⁵ Ie abímo ite rafuemo comecina dama bu facaia, ja muidomo faifite; ia cuemo ite rafuemo comecina bu facaia, monamo jaca iite. ²⁶ Cuená bu raise sedaacania, cue rafuedo naimie jaite. Cue llofuegamiena naimie jaillamona, cuemona fueoite. Iemona cue Moodí naimiena camare itataite. ²⁷ Cue comeci jai rucaicuerite; iadedí, ¿ñiese raiticue? Raiñeiticue: “Moo, cue fiodaillemona cuena jillote”. Fiodailena biticue. Ie jira raiticue: ²⁸ “Moo, cominina o uai siñonana uíñota”.

Ieconí monamona Jusiñamui llote:

—Jai iena finodicue. Dane iena finoiticue.

²⁹ Jusiñamui ñaiana nainomo ite comini raise cacaiñenano, raitimaci:

—Mona gurude.

Jiaino raitimaci:

—Naimiemo Jusiñamui jaienicí llote.

³⁰ Jesús uai ote:

—Cue facaina naie lluana cacaiñedomoi; iadedí omoi facaina iena cacadomoi. ³¹ Cuená uíñoñedíno duere sefuilla facaise ja taíneite. Taife

anamo comini jai itimaci; ia Jusiñamui Taifena ja anafefitaite. ³² Cruzmo cue fiodaia, naimacina jilloitallena, ailluena cominina cue dibeimo itataitue. ³³ —Naimie fiodaillana naimaci uiñollena, iese llote.

³⁴ Naie comini uai otimaci:

—Jusiñamui facaina lloraini micoriai jaie cuega: “Cai Jilloitaraima jaca fiodaiñeite”. ¿Niese raitio: “Jusiñamuimona biticue; ia fiodaiticue”?

³⁵ Jesús dane uai ote:

—Cue llofua dinori omoi comeciaina nia lligaiñoticue. Cue lluomo cacarei. Omoi diga cue nia ia, cue llofuiamo cacarei. Jitiredemo bu macaria, nai illana raise uiñoñede. Ie isoide. Jeacino anamo itinodi jitiredinomo itimaci isoidimaci. Uanaicinona uiñoñedimaci. ³⁶ Jeacino anamona omoi jilloillena, cue llofua uaido omoi comeciaina birui lligaiñoticue. Cue uaina ñno, cue cominina omoi jaillena.

Bie llua mei, Jesús oni jaillano, naimacimona reirite.

Comini Jesús uaina ñnoñena rafue

³⁷ Jesús diga siño rafuena finode; iadedi ailluena comini: “Naimiedi cai Jilloitaraima” raillana nia ñnosñede. ³⁸ Iemona Isaías micori jaie cuegafuiai suide. Naimie jaie cuega:

Jusiñamui, cai lluacinona cacadimaci.

O siño uaido o finoca rafuena jiai cioidimaci; iadedi ñnoñedimaci.

³⁹⁻⁴⁰ Isaías micori dane cuega:

Naimaci ctoi raillano, Jusiñamui naimacina uisinidino isoi itatate.

Naimaci comeciainona abina uiñoi raillano,
naimaci comeciaina feitate.

Naimiena ñnoi raillano, iese naimacina jai itatate.
Ie jira jai ñnonidimaci. ⁴¹ Jusiñamui ie ebirede
rafuena naimie ciuamona, Isaías micori iena llote.
Isaías micori Jesúna llote. ⁴² Isaías micori iese
llote; iadedi ailluena judíuai illaicomini Jesús
uaina ñnotimaci. Fariseuaina jaciruillanona, iena
janotimaci. Naimaci ofiracomona naimacina
jino dotajana jaciruitimaci. ⁴³ Comini naimacina
iobitajana naimaci eo jitailla jira, dotajana ji-
taiñedimaci. Jusiñamuimo ite iobillacinona raise
oiacaiñedimaci.

Jesús ie Moona ñaia rafue

⁴⁴ Naie facaise Jesús eo ado llote:

—Cuenta ñnotimie cuenta oretatimiena jiai jai
ñnote. ⁴⁵ Cuenta ciotimie cuenta oretatimiena jiai
ciode isoide. ⁴⁶ Comini comeciaina lligaiñollena
biticue. Ie muidona naga cuenta ñnotimie
jitiredinomo jai iñede. Jeacino anamo jai iñede.
⁴⁷ Cue uaina cacajano ñnoñedimie mo juez isoi
birui lloñedicue. Cominina duere finollena,
biñedicue; iadedi naimaci jeacinomona naimacina
jilloitallena biticue; ⁴⁸ ia cuenta bu ñnoñenia,
cuenta uaina naimie ñnoñenia, ja muidona faifite.
Cuenta uaina naimie ñnoñellemona, nana naimiena
ñnoñedino janafefilliruimo Jusiñamui naimiena
ico duere finoite. Cuenta jitaiñedimie, cuenta uaina
jitaiñedimie comini janafefilliruimo janafefite.
⁴⁹ Dama cuenta comeci facaja uaido lloñedicue. Cuenta
Moo cuenta oretaja muidona, cuenta Moo cuemo
lloga uaido lloticue. ⁵⁰ Cuenta Moo lloga uaidi naimie

dibeimo cominina jaca itatate. Iena uiñoticue. Ie jira cue Moo cuemo lloga uaina jaca lloticue.

13

Jesúdi ie llofueoicaigano eillina jocua rafue

¹ Pascua railla rafue riacana areruido ia, Jesús ie Moo dine abido jaiacanana uiñote. Naimaci diga naimie nia ia, ie cominina jaca eo isiruite. ² Jesúna gatatalena, naie facaise Taifedi Judas Iscariote micori comecina feidote. Judas micori Simón jito.

³ Jesúdi ie uai ie Moomona feiñuana uiñote. Ie Moo dinena billana uiñote. Ie Moo dine abido jaillena jiai uiñote. ⁴ Nairuido Jesús cai diga guite. Guilla meinocni, Jesús a naidacaida ie abimo ite iniroina duiñode. Abi dora diga ie moillina ferinote. ⁵ Janorede nogomo jinuina totaja mei, cai eillina jocode. Safenaillena, ie dora diga dote.

⁶ Simón Pedro dine naimie ria, Pedro jicanote:

—Nama, ¿cue eillina jiai jocoitio?

⁷ Jesús uai ote:

—Cue finoca rafuena birui uiñoñedio; iadedi jiairuido uiñoitio.

⁸ Pedro uai ote:

—Cue eillina jaca jocoñeitio.

Jesús uai ote:

—O eillina cue jocoñenia, cue facaina iñeitio.

⁹ Pedro uai ote:

—Nama, dama cue eillina jocoñeno. O facaina raise cue illena, cue onolli, cue ifogi diga, jiai joco.

¹⁰ Jesús uai ote:

—Nana o abina jocoñeiticue. Da o eillina jocoiticue. Jai noidimie mena icaiño noiñede. Ie abi jai jeanide. Dama ie eillina nibai dane jocoacade.

Omoï comeciaï jiaï jai jeanide; iadedi omoïmona damie comeci nia jearede.

¹¹ Naimiena gaitataiacadimiena naimie uiñua jira, iese llote.

¹² Cai eilliaina jocua mei, ie iniroi dane jitaja mei, dane ana rainadajanona, caimo jicanote:

—Omoïmo ailli cue finoca rafuena nibai raise cacaiñedomoi. ¹³ Cuen a “Cai Nama” raicabitomoi. “Cai llofueraïma” cuena jiaï raicabitomoi. Iese cuena omoï raia, mare. Ie isoi iticue. ¹⁴ Omoï Namadicue. Omoï llofueraïmadicue; iadedi omoï mullaïma isoi iticuedena, omoï eilliaina jai jocodicue. Omoï jamai bue isoidinomona, omoï eilliaina danirie jocua. ¹⁵ Cuemona fueo. Abi iedoñoeno cue isoi omoï jai. Cue afemo iñedomoi. ¹⁶ Uanai omoïmo lloticue. Mullaïma ie nama afemo iñede. Oretagamie ie oretatimie afemo iñede. Ie isoide. Cue afemo iñedomoi; ia omoï eilliaina jocodicue. “Jiamie afemo iticaï” raillanomo comecina omoï facañeno. ¹⁷ Bicino omoï uiñuamona, iese omoï finoia, caimare iitomoi. ¹⁸ Nana omoïna iese ñaiñedicue. Nana cue fetocanona uiñoticue. David micori jaie llote: “Cue diga guitinomona damie cuena enoidimie ite”. ¹⁹ Bie nia suiñenia, iena jai lloticue. Iena cuemo suilla mei, David micori llogacino raise ñnoitomoi. ²⁰ Uanai lloticue. Cue oretagamiena bu feiñoia, cuena jiaï feiñote. Bu cuena feiñoia, cuena oretatimiena jiaï feiñote.

*Jesúdi ie gaitataitimiëna llua rafue
(Mt 26.20-25; Mr 14.17-21; Lc 22.21-23)*

²¹ Jesús iese llua mei, ie comeci sunaite. Llote:

—Uanai lloticue. Omoimona damie cuena gaitataite.

²² Caimona ¿nimie naimiena gaitataite? railanona, comecina facajano, coninimo eroridicai.

²³ Cuenas Jesús eo gaia jira, Jesús abimo iticue.

²⁴ Cuenas uaiduanona, Pedro cuemo llote:

—“¿Bu ona gaitataite?” Jesúmo jicano.

²⁵ Ie jira Jesúmo jicanoticue:

—Nama, ¿bu ona gaitataite?

²⁶ Jesús uai ote:

—Bie llomeniconas mutajanona, naimiemo fecaiticue —raite. Mutaja mei, Judas micorimo fecade. Naimie micoridi Simón Iscariote jito.

²⁷ Llomeniconas guilla meinoconi, Taife anamo Judas micori illamona, Taife naimie comecina feidote. Jesús naimiemo llote:

—O finoacaga rana raire fino.

²⁸ Jesús Judas micorimo lluanas raise uiñoñedicai.

²⁹ Judas micori ucubenas sedajas jira, jiaino comecinas facade: “ ‘Cai jitaille guille ibarisai’ Jesús naimiemo llote”. Iese lloñenia, “ ‘Janore ucube dueredinomo feca’ nibai naimiemo llote”.

³⁰ Guilla mei, Judas micori jino jaide. Naie facaise jai jitireficaide.

Jesús ie fiodaillenas ñaia rafue

³¹ Judas micori jailla mei, Jesús llote:

—Jusiñamuimona billanona, imanas jaidicue; ias cues fiodaille facaise jai ride. Cue fiodaillmonas cominidi Jusiñamui uai siñonanas uiñoitimaci.

³² Iemona Jusiñamui uai siñonanas comini uiñoias, Jusiñamuidi comininas cues siño Jitonas jai uiñotaite. Iese ja finoite. ³³ Cue comini, dallu omoi diga

bene iticue. Jaiticue. Cue diga iacanitomoi. Judíuai illaicominimo navui cue llua isoi, omoimo ja lloiticue. Cue jaillinomo nia jaiñeitomoi. ³⁴ Ie jira jiaie rafuena omoimo ja lloiticue. Omoina cue isiruilla isoi, coninina omoi isirui. ³⁵ Coninina omoi isiruillamona, jiaie cominidi cue cominidomoina uiñoitimaci.

Pedro Jesús diga ñaia rafue

(Mt 26.31-35; Mr 14.27-31; Lc 22.31-34)

³⁶ Naie facaise Pedro naimiemo jicanote:

—Nama, ¿nine jaitio?

Jesús uai ote:

—Cue jaillinomo cue diga ja jaiñeitio. Jiairuido jaitio.

³⁷ Pedro uai ote:

—Nama, ¿bue ñellena ja jaiñeticue? O jitaia, o facaina ja fiodaiticue.

³⁸ Jesús dinena uai ote:

—Cue facaina fiodaiacadio. Uanai omo lloticue. Nia monañenia, itava nia ñañenia, dacaño amani cuena janoitiosa.

14

Jesús ie Moo dinomo rille rafue

¹ Jesús ie llofueoicaiganodicaina nia llofujete:

—Rucaicueriñeno uri i. Jusiñamuina ñnocana jai. Cuenajai ñnocana jai. ² Cue Moo illanomo diga comini illanuai ite. Iese iñedena, omoimo jai lloticue. Omoi illinuaina raise finollena, nainomo jaiticue. ³ Fuiduanona, dane abido biiticue. Omoina cue dine uillena, cue dine omoi illena, biiticue. ⁴ Cue jaillinona birui uiñotomoi. Nainomo omoi rillena jiai uiñotomoi.

⁵ Tomás uai ote:

—Nama, o jaillinona uiñoñedicaí. ¿Ñiese nain-omo riiticaí?

⁶ Jesús uai ote:

—Omoí naiso isoidicue. Uanaicinona lloticue. Cue Moo díbeimo comínina jaca itataticue. Cue Moo díne joide naiso isoidicue. Jaca dasode cue Moomo duide naídi. Cue Moo díne o ría, cuena ñno. ⁷ Cuena uiñotomoina, cue Moona jiaí uiñotomoi. Biruidemona naimiëna uiñoitomoi. Naimiëna jai ciódomoi.

⁸ Felipe uai ote:

—Nama, o Moona caímo acata. Iemo jai macaíbaite.

⁹ Jesús uai ote:

—Felipe, are omoí díga iticue; iadedí cuena nia uiñoñedomoi. Cuena ciódimie cue Moona jiaí jai cióde isoide. ¿Ñiese llotío: “O Moona caímo acata”? Cue Moona jai ciódió isoidío. ¹⁰ Cue Moo díga daajedicoco. Iena nia ñnoñedio. Cue lluaí cue Moo uai. Cue lluaí cue comeci iuaiñede. Cue motodo naimie maijide. ¹¹ Cue Moo díga daajedicocona ñno. Cue uaina omoí ñnoñenia, siño rafuena cue finua jira, cuena ñno.

Jesús ie Moo Joreñona llua rafue

¹² Jesús nia llofue:

—Uanai lloticue. Cuena omoí ñnoia, cue finoca rafuena jiaí finoitomoi. Cue Moo díne cue jailla jira, cue Moo Joreñona omoí díne cue oretaja mei, cue finua baífemo finoitomoi. ¹³ Cue Moo uai siñonana omoí uiñollena, buena cue díbeido cue Moomo omoí jicaia, nana iena finoiticue. ¹⁴ Cue díbeido omoí jicaia, iena finoiticue. ¹⁵ Cuena

omoi isirua, cue llogacinuaina inoitomoi. ¹⁶ Ie Joreño omoimo fecallena cue Moomo jiiiticue. Naie Joreñodi omoina canoite. Omoi diga jaca iite. ¹⁷ Uanaicinona llocabite. Naimiena naimaci uiñoñena jira, cuena inoñedino naimiena feiñonidimaci; iadedi naimie omoi diga illa jira, naimiena uiñotomoi. Omoi diga jaca iite. ¹⁸ Omoina fainonocaiñeiticue; ia dane biiticue. ¹⁹ Nano nigarui illanona, cuena inoñedino cuena nia cioitimaci. Ie mei cuena cioiñeitimaci; iadedi fiodaillamona cue jillua mei, cuena nia cioitomoi. Cue jaca illa jira, jiai jaca iitomoi. ²⁰ Fiodaillamona cue jillua mei, cue Moomo cue duillana raise uiñoitomoi. Cuemo omoi duillana jiai raise uiñoitomoi. Omoimo cue duillana jiai raise uiñoitomoi. ²¹ Cue llogacinuaina omoi isirua, cuena isiruitomoi. Ie jira cue Moodi omoina jiai isiruite. Omoina jiai isiruiticue. Omoina cuena uiñotaiticue.

²² Iscariotena mamecireñede Judas naimiemo jicanote:

—Nama, ¿bue ñellena dani caina ona uiñotaitio; iadedi jiaie cominina ona uiñotañeitió?

²³ Jesús uai ote:

—Cuena isiruitinona cue rafuena uiñotadicue. Bu cuena isirua, cue llogacinuaina inoite. Cue Moo naimiena isiruite. Iemonā naimiena nabaiticoco. ²⁴ Bu cuena isiruiñenia, cue llogacinuaina inoñede. Cue llogacinodi cuejeñede. Cue Moo ie. Naimie cuena oretate. ²⁵ Omoi diga nia cue illamona, bie llogacinuai omoimo jai lloticue. ²⁶ Cue Moodi omoina canollena, naga rafuena omoina llofuellena, cue facaina ie Joreñaona omoimo oretaite. Omoina nana

omoimo llogacinuaina comecitaite. ²⁷ Cue Moo dine jaiticue; iadedi omoi comeciaina uri itataiticue. Cuena inoñedino omoi comeciaina iese itatanidimaci. Jarire iñeno. Jaciruiñeno. ²⁸ Ailli cue llwana cacadomoi: “Cue Moo dine jaiticue; iadedi dane biiticue”. Cue Moo dine cue jailla jira, cuena omoi isiruia, cueri iobitomoi. Cue Moo cue afemo ite. ²⁹ Bie rafue cuemo nia suiñenia, uicodo omoimo iena jai lloticue. Naie suia, cuena fainonocaiñeno omoi jaillena jitaidicue. ³⁰ Omoi diga are nia ñaiñeiticue. Cuena inoñedino anamo itimie cuena jai duere finoacade. Taifena ñaiticue. Naimie anamo iñedicue; ³¹ iadedi cue Moona cue isiruillana cuena inoñedino uiñollena, cue Moo cuemo llua isoi, finoiticue. Mai cai jailli.

15

Uvas railla riarra ie rafue

¹ Jesús nia llofujete:

—Cue dibeimo marena omoi illena omoi raise uiñollena, jiaie rafuedo iena llofueiticue. Uvas railla ua riaradicue. Cue Moodi uvas railla riarra sedaraima. ² Cue amena igailaidomoi. Llisiñede igai cue Moo cugaica. Eo llisillena, naga lliside igaina janore muido jaigaica. Ie isoide. ³ Cue llogacinuaido jaillamona, jai jaigaica isoidomoi. Iemona omoi comeciái jai jeanide. ⁴ Cuena nabai. Ona jiaí nabaiticue. Naie amenamo jai duiñena jira, daje dibegaise jaitaca igaidi jai llisiñede. Ie isoide. Cuena omoi nabaicabiñenia, llisiñede igai isoidomoi. Ie jira cuena nabai. ⁵ Uvas railla riaradicue. Cue amena igailaidomoi. Cuemo omoi duiadedi, omoimo cue duiadedi, eo

lliside isoidomoi; iadedi cuemo omoi duiñenia, jaca llisiñede isoidomoi. Cuemo omoi duiñenia, cue jitailla isoi mare rafuena jaca finoñeitomoi. ⁶ Jai duide igaillai safenailla mei, marañena jira, jobaillena, danomo ofitaticai. Cuemo duiñedimie jai duide igai isoide. Jusiñamuimona duere sefuite. ⁷ Cuen a omoi nabaia, cue uaina omoi feitañenia, omoi jitailla rana jica. Ie mei feiñoitomoi. ⁸ Eo lliside omoi isoia, cue Moo iobide. Iese omoi ia, ua cue cominidomoi. —Iese Jesús llofuate; ia naimie dibeimo naimaci raise illena ñaite. Mare rafuena naimaci finocana jaillena ñaite.

⁹ Nia llofuate:

—Cuen a cue Moo isiruilla isoi, omoina isiruiticue. Cuen a nabaicabi. ¹⁰ Cue Moo llogacinuaina cue ñnuamona, naimie isiruillacino anamo iticue. Cue Moo llogacinuaina omoi ñnuamona, cue isiruillacino anamo itomoi. ¹¹ Cue isoi omoi comeciai eo caimarellena, bicinuai omoimo lloticue.

¹² Dane bie rafuena lloticue. Omoina cue isiruilla isoi, coninina omoi isirui. ¹³ Naimaci o isiruillamona, o nabaiñiai facaina o fodaia, naimacina eo uaisiruitio. ¹⁴ Cue llogacinuaina omoi ñnoia, cuena nabaidomoi. ¹⁵ Omoina “Cue mullaiaidomoi” jaca raiñedicue; iadedi omoina “Cue nabaiñiaidomoi” birui raiticue. Mullaiaia imaci patrón finoca rafuena uiñoñedimaci. Ie jira nana cue Moomona cue cacaja rafuena omoimo jai lloticue. Ie jira nana cue rafuena jai uiñotomoi. ¹⁶ Cuen a fetoñedomoi; iadedi omoina fetodicue. Omoi lliside isoicabillana omoimo jai lloticue. Ie mei buena cue mamecido cue Moomo omoi jicaia,

omoimo fecaite. ¹⁷ Coninina omoi isiruillena jai lloticue.

Comini Jesúna enoilla rafue

¹⁸ Jesús nia llofujete:

—Cuenta inoñedino omoína enoia, nano cuenta jai enoidimaci. Iena uiñotomoi. Omoína nia enoiñenia, cuenta jai enoidimaci. ¹⁹ Naimacimo jainaiadomoína, omoína isiruitimaci; iadedi naimacimo omoi jainaiañena jira, omoína cue fetua jira, omoína enoidimaci. ²⁰ Omoimo jai lloticue. Illaíma duere sefua, naimie anamo itino jiaí duere sefuidimaci. Ie isoide. Cuenta comini duere finua isoi, omoína jiaí duere finoitimaci. Cue llofuiacinona naimaci inua isoi, omoi llofuiacino jiaí inoitimaci. ²¹ Cuenta oretatimiena naimaci uiñoñena jira, cue muidona iese finoitimaci. ²² Naimacimo ite jeacinona naimacimo lloñedicuenta, naimacimo ite jeacinona uiñoñedimaci. Cue rafuena naimaci cacajamona, naimacimo ite jeacinona jai uiñotimaci. Naimacimo jeacino nia ia, naimaci muidona. ²³ Cuenta enoidimiedi cue Moona jiaí enoide. ²⁴ Eo siño rafuena naimaci motomo finodicue. Buna cue isoi jaca finoñede. Iena finoñedicuenta, naimacimo ite jeacinona uiñoñedimaci. Cue siño finoca rafuena jai cidimaci. Ie jira cuenta enoidimaci. Cue Moona jiaí enoidimaci. ²⁵ Naimacina David micori jaie llote: “Naimacimo buena finoñedicue; ia cuenta enoidimaci”. Naie ciegafuiaí jai suide.

²⁶ Cue Moo ie Joreño omoimo oretaita. Ie Joreño omoína canoite. Omoína uanaicinona uiñotaite.

27 Cue nano lluaruimona cue diga omoï illa jira, cue facaisena jiaï raise lloitomoï.

16

Judúuai illaicomini Jesús llofueoicaiganona duere finua rafue

¹ Jesús nia llofueite:

—Danomo abido omoï jaiñellena, cue uaina omoï fainonocaiñellena, bicinuai omoïmo ja lloiticue. ² Omoï ofiracomona illaicomini omoïna dotaitimaci. Jiaïruido omoïna meiniamona: “Jai Jusiñamuina marena sedadicaï”, comeciaina facaitimaci. ³ Cuena naimaci ñnoñena jira, cue Moona jiaï naimaci ñnoñena jira, iena finoitimaci. ⁴ Bie rafue omoïmo sua, naie facaise cue lluaña omoï comecillena, omoïmo birui lloticue. Omoï diga cue illa jira, navui iena lloñedicue; iadedi omoïmona birui oni jaiticue.

Jesús Jusiñamui Joreñona llua rafue

⁵ Jesús nia llofueite:

—Cuena oretatimie dine ja jaiticue; iadedi omoïmona buna: “¿Ñine jaitio?” cuemo jaca nia jicanoñede. ⁶ Omoïmo bie rafue cue llua jira, omoï comeciái eo sure ite. Ie jira cue jaillinona jicanoñedomoï. ⁷ Uanai lloticue. Cue jaia, mare. Cue jaiñenia, omoïna canoraima omoï dine biñeite. Cue jaia, omoï dine naimiena oretaiticue. Jusiñamui Joreñodi omoï canoraima. ⁸ Naimie bia, cuena ñnoñedinona naimacimo ite jeacinona uiñotaite. Naimiedi Jusiñamui marena naimaci illana jitaillana uiñotaite. Naimiedi Jusiñamui naimacina duere finollena jiaï uiñotaite.

⁹ Cuenā naimaci ñnoñenia, naimacina naimacimo jeacino nia illana uiñotaite. ¹⁰ Cue Moo ñine abido cue jaillinona, cuena cioñeitimaci; ia iemona Jusñamui Joreño cue uaina siñonana uiñotaite. ¹¹ Fiodaillemona jilloitícue. Iemona cuena ñnoñedino anamo itimiedi cue Moo janafefillacino anamo iite. Taifena ñaitícue. Cue finoca rafue muidona, cue Moo Joreñodi cominina, cue Moo Joreñodi cominina naie janafefillemona jilluana uiñotaite. ¹² Diga rafue omoimo nia lloiacadícue; iadedi jai rairafaidomoi. ¹³ Jusñamui Joreño bia, omoimo nana uanaicinuaina llofueite. Dama ie facaina llofueñeite; iadedi ie cacajacínodo llofueite. Jiairuido suille rafuena llofueite. ¹⁴ Omoína cue rafuena uiñotaite. Ie jira cuena iobitaite. Nana cue Moomo ite uaidí cueje. ¹⁵ Ie jira bie rafuena llotícue. Jusñamui Joreño omoína cue rafuena raise uiñotaite.

Sunaillamona caimare illa rafue

¹⁶ Jesús nia llofueite:

—Dallu illanona cuena cioñeitomoi. Ie mei dallu illanona, cuena dane cioitomoi.

¹⁷ Ie llofueoicaiganodícaimona damierie daní coninimo jicanodosite:

—¿Ñiese caimo llote: “Dallu illanona, cuena cioñeitomoi. Ie mei dallu illanona, cuena dane cioitomoi. Cue Moo ñine jaitícue”? ¹⁸ ¿Buena caimo llote? Raise cacañedícaí.

¹⁹ Caí jicanuana Jesús uiñuanona, naimie jicanote:

—¿Cue lluana raise uiñoiacadomoi? ²⁰ Cuemo suille rafue suia, eo eitomoi; iadedi cuena ñnoñedino eo iobitimaci. Sunaitomoi; iadedi

jiairuido caimare iitomoi. ²¹ Jiaie uaido iena lloiticue. Riño jocoacania, naiñaiño jigico isirede. Jocua mei, naiñaiño urue jeiciamona, isirenadi feibicaide. Iemona jai iobide. ²² Ie isoide. Ja sunaitomoi; iadedi dane omoina cioiticue. Fiodaillamona cue jillua mei, dane cuena cioitomoi. Ie mei caimare iitomoi. Iemona omoina buna sure itatañeite. ²³ Nairuimo cuemo buena jicaño; iadedi cue Moomo jica. Ie mei cue muidona naimie omoimo fecajte. ²⁴ Cue mamecido cue Moomo buena jaca nia jicañedomoi. Jica. Ie mei feiñoitomoi, omoi comeci eo caimare illena.

Jiairuido Jesús marefodo llua rafue

²⁵ Jesús nia llofuede:

—Jiaie uaido bicinona omoimo jai lloticue. Jiairuido iese lloñeiticue. Omoina cue Moona marefodo lloiticue. ²⁶ Nairuimo cue Moomo omoi facaina jicañeiticue. Cue mamecido cue Moomo omoi jitaillacinona dani jicaitomoi. ²⁷ Omoina naimie isiruillamona, omoimo fecajite. Cuen a omoi isiruilla jira, cue Moomona cue billana omoi inua jira, cue Moo omoina isiruite. ²⁸ Cue Moomona enruemo biticue. Naimie dine abido jaiticue.

²⁹ Lloticai:

—Jai marefodo caimo llotio. O uaina meidocana jai uiñedio. ³⁰ Nana rafuena o uiñuana uiñoticaí. Cai comeciaino iticinona o uiñuamona, caina raise uiñotio. Iemona Jusiñamuimona o billana jai inoticaí.

³¹ Jesús uai ote:

—Cuenta jai ñnotomoi. ³² Jiairuido, ua birui, oni tuuitomoi. Nagamiai jofomo omoi jailla mei, dama ifoconi fiebiticue; iadedi dama iñeiticue. Cue Moo cue diga iite. ³³ Cuenta omoi ñnuano, omoi uri illena, omoi mo bie lloticue. Eniruemo omoi ia, jaca duere sefuitomoi; iadedi omoi comeciaina ocuiño. Omoina duere finodinona jai cue emodofilla jira, omoi comeciaina ocuiño. Naimaci baifemo faiticue.

17

Jesús ie Moo diga ñaia rafue

¹ Jesús bicinona llua mei, monamo eruaillano, jide:

—Moo, cue fiodaiacanarui jai ride. Cue uai siñonana uiñota. Iemei o uai siñonana jiai uiñotaiticue. ² Nana comini afemo cuenta jai itatatio. Himana cue jaillamona, nana comini afemo cuenta jai itatatio. Comini comeciiai iuaina o meidotajamona, cue fiodaillamona, ailluena comini o diga jaca iitimaci. ³ Ona nanoca Jusiñamuina uiñoitimaci. Jai cuenta o oretajana jiai uiñoitimaci. ⁴ Ailluena siño rafuena jai finodicue. Nana o cuemo lloga rafuena cue finuamona, bene ona jai iobitadicue. ⁵ Ore Moo, enirue nia iñena facaiseconi o diga iticue. Illaima isoi o ecimo dane ebire iacadicue. Dane cuemo ine, daje isoi coco illesa. ⁶ Comini comeciiai iuaina o meidotajamona, naimacina jai llofuecabiticue. O anamo naimaci illamona, omo ite rafuena llofuecabiticue. Iemona o rafuena ñnocana jaidimaci. ⁷ Nana cuemo ite rafue omona feiñoticue. Iena jai uiñotimaci.

8 Nana cuemo o llogacinuaina naimacimo jai lloticue. Jai ñnotimaci. Omona cue billana jiaí jai ñnotimaci. Cuen a o oretajana jiaí ñnotimaci. 9 Naimaci facaina birui jiidicue. Naimacina cuena ñnotadio. Ie jira omo jai duidimaci. Ona ñnoñedin o facaina birui jiiñedicue. 10 Nana o ñibeimo itinodi cueje. Nana cue ñibeimo itinodi oie. Nana naimaciri iobidicue. 11 Bene eniruemo fiebitimaci. Eniruemon a monamo jaiticue. O ñine abido jaiticue. Ore Moo, jeacino naimaci finoi raillano, o anamo o uai ñiga naimacina seda. Coco comeci lloilla isoi, naimaci daje isoi comeciaina lloita. 12 Naimaci ñiga ñia cue ia, naimacina cue anamo sedadicue. Naimacina raise sedadicue, naimaci feirai raillano. Naimaci motomona dama Judas feiraite. Jusiñamui lloraíma micori ciegafuiaí suillena, naimie ua faífite. 13 O ñine ja jaiticue. Cue isoi naimaci comeciái eo caimare illena, naimacimo ailluena rafuena jai lloticue. 14 O llogacinuaina jai lloticue. Ona ñnoñedinomo naimaci jainaíaiñena jira, ona ñnoñedin o naimacina enoidimaci. Ona ñnoñedinomo jiaí jainaíaiñedicue. 15 Eniruemon a birui o naimacina uana jicanoñedicue; iadedi Taifemona naimacina o sedajana birui jicanoticue. 16 Ona ñnoñedinomo jainaíaiñedinimaci. Ona ñnoñedinomo jiaí jainaíaiñedicue. 17 O llogacinuaido naimacina marena itata. O llogacinuaidi uanaicino. O jitaillacinona naimaci finollena, o uai naimaci comeciáimo raise itata. 18 Bene cuena o oretaja isoi, ona ñnoñedin o ñine naimacina oretaticue. 19 Uanaicinona naimaci uíñuamona, naimaci comeciái marebicaillena, cuena ñnotino facaina

fiodaiacadicue. ²⁰ Bimacina birui dane jiiñedicue; iadedi bimaci cue rafuena ico lloia, jiaie comini cuena iiñoitimaci. Cuena ico iiñoitino facaina birui jiai jiiñedicue. ²¹ Daajedicoco. Coco illa isoi, naimaci comeciaina daje isoi lloillena, nana naimaci facaina jiiñedicue. Daje isoi comeciailloillamona, cuena nia iiñoiñedinodi iiñoitimaci. Iemona cuena o oretajana iiñoitimaci. ²² Cuemo o iga uaidi ebirede. Naimaci comeciailloillena, naimacimo o uaijai cue iga. ²³ Naimaciri dajedica. O diga daajedicoco. Naimaci comeciailloillana jitaedicue. Iemona cuena iiñoiñedino bene cuena o oretajana uiñoitimaci. Cuena o isiruilla isoi, naimacina o isiruillana jiai uiñoitimaci. ²⁴ Ore Moo, naimaci cue dine illena jitaedicue. Enirue nia iñenia, illaia isoi o ecimo ebire jaie iticue. Dane ie isoi ebire birui cue ia, naimaci cuena ciuana jitaedicue. ²⁵ Ore Moo, mareuidimedio. Jiaie comini ona uiñoiñedinomaci; iadedi ona uiñotiticue. Cue llofueoicaiganodi o cuena oretajana jai uiñoitimaci. ²⁶ Naimacimo ona jai llotiticue. O cuena isiruilla isoi coninina naimaci isiruillena, naimacimo nia lloititicue —jiiñede.

18

Jusúna gaitalle rafue

(Mt 26.47-58; Mr 14.43-54; Lc 22.47-54)

¹ Jia mei, Jesús ie llofueoicaiganodicai diga, Cedrón railla iconi enefebeimo ruica aceituna railla riaraiailloillanomo naiona jaide. ² Jesús cai diga nainomo jaisoilla jira, Judas micori naie illanona jiai uiñote. Jusúna gaitatallena nainomo Judas jaide. ³ Soldaduai diga policías diga jaide.

Naimacina ifode. Jusiñamui diga nanoca ñairaini naimacina oredimaci. Fariseuai naimacina jiai oredimaci. Soldaduaidi lamparíniari bitimaci. Reinaiairi jiai bitimaci. Sidaniairi jiai bitimaci. Judas naimacina ifode. ⁴ Jesúsdi nana naimiemo suille rafue uiñuanona, naimaci dine billano, jicanote:

—¿Buna jenodomo?

⁵⁻⁶ Uai otimaci:

—Nazaret ie Jesús.

Jesús uai ote:

—Imiedicue.

Iena cacajano, jacinailamona, abido ñaijillamona, eniruemo uaidimaci. Jesúsna gaitatallena, Judas micori naimaci diga ite.

⁷ Jesús dane jicanote:

—¿Buna jenodomo?

Uai otimaci:

—Nazaret ie Jesús.

⁸ Jesús uai ote:

—Omoimo jai lloticue: “Imiedicue”. Cuen a omoi jenoia, cue diga itino oni jaillena rairuiño.

⁹ Naimie ie Moomo como lloga uai suillena, iese llote. Iese ie Moomo como llote: “Cuen a ñnotaganomona jaca buna faifiñedicue”. ¹⁰ Ie daacaiño Simón Pedrodi ie lloebi llinocaida, Jusiñamui diga nanoca ñairaima mullaïma jefona jaïbonote. Naie mullaïma mamecidi Malco. ¹¹ Iena ciuanona, Jesús Pedromo llote:

—O lloebina eeno. Cue Moo jitailla isoi, fioidaiticue.

¹² Ie mei soldaduai, imaci capitán diga, judíuai imaci policías diga, Jesúsna gaitajano, naimiena

maitimaci. ¹³ Anás dine nano uitimaci. Anásdi Caifás jifai. Caifásdi Jusiñamui diga nanoca ñairaima. ¹⁴ Navui Caifás judíuai illaicomínimo llote: “Damie nana cai comini facaina fiodaitena, mare”.

Pedro Jesúsna nano janua rafue

(Mt 26.69, 70; Mr 14.66-68; Lc 22.55-57)

¹⁵ Simón Pedro Jesús jinafo racade. Jiai racadicue. Cuená Jusiñamui diga nanoca ñairaima uñua jira, ie nairairimimo Jesús diga jaidicue; ¹⁶ iadedi Pedro nasemo fiebicaide. Ie jira jino abido jaillano, Pedro fo atillena, nasena sedaraiñomo jicanoticue. ¹⁷ Naiñaiño Pedromo llote:

—Jesús llofueoicaigano imiedio.

Pedro uai ote:

—Ieñedicue.

¹⁸ Rosirena jira, naie jofo mullaiai, policías diga, cooci diga irai bonodimaci. Agaillena irai ecimo naidaidimaci. Agaillena Pedro naimaci motomo jiai ite.

Jesús Anás dine illa rafue

(Mt 26.59-66; Mr 14.55-64; Lc 22.66-71)

¹⁹ Ie facaise Anás Jesúsno ie llofueoicaiganodicaina jicanote. Ie llofuiacinuaina jiai jicanote. ²⁰ Jesús dinena uai ote:

—Nana comínimo marefodo lloticue. Omoi ofiracuaimo jaca llofuecabiticue. Jusiñamui jofomo jiai jaca llofuecabiticue. Nainomo nana o comini oficabidomoi. Bainino buena jaca lloñedicue. ²¹ ¿Bue ñellena birui cuemo jicanotio? Cuená cacadinomo iena jicano. Cue llofuiana uñotimaci.

²² Iese Jesús llua jira, daje policia naimie uiecona butade. Jesúmo jicante:

—¿Bue ñellena iese uai otio?

²³ Jesús dinena naie uai ote:

—Naimie uai jeare oticuenta, cuemo llono. Jeare oñedicuemo, ¿bue ñellena cuena butadio?

²⁴ Jesús uai oñede. Iemei Anásdi Caifás jofomo Jesús maianona orede.

Pedro Jesúsna dane janua rafue

(Mt 26.71-75; Mr 14.69-72; Lc 22.58-62)

²⁵ Ie facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

²⁶ Naie facaise daje mullaíma Pedromo llote:

—Aceitunas railla riaraiái illanomo ona cidicue —llote. Jusúna soldaduai gaitaja facaiseconi Pedro naie mullaíma ie come jefona aillí jaibonote, soldaduai Jesúsna gaitaja ie daacaiño. ²⁷ Pedro dane janote. Ieconi iitava ñaite.

Jesús Pilato dine illa rafue

(Mt 27.1-2, 11-14; Mr 15.1-5; Lc 23.1-5)

²⁸ Ie mei Caifás jofomona gobernador jofomo Jesúsna jitiramo uitimaci. Naie facaise gobernador di Pilato. Naimiedi judíuaiñedimie. Naimaci einamaci rairuilla jira, judíuaiñedimie jofomo naie facaise fo jaiñedimaci. Fo jaiadedi, pascua railla rafue guilledí guiñega. ²⁹ Ie jira Pilato jino bite. Naimacimo jicante:

—¿Ñie isoide rafue muidona llogidotomoi?

³⁰ Uai otimaci:

—Bimie marañede rafue finoñedena, o dine naimiena atiñedicaí.

³¹ Pilato llote:

—Naimiena uiño. Omoí einamací llogacínuaído naimiena duere fino.

Uai otimaci:

—Come meinellena caimona rairuidomoi. Naimie coraiana jitaidicaí —llo timaci. ³² Navui Jesúsdi: “Cuena cruzmo coraitimaci” llote. Naie llucacino jai suisaide.

³³ Pilato fo abido jaillano, Jesúsna uaiduano, naimiemo llote:

—Judíuái illaíma raillamiedio.

³⁴ Jesús dinena jicanote:

—¿O comecina dama íese facajano llotio? Íese comecina o facañenia, jiaímie omo lloga.

³⁵ Pilato uai ote:

—Judío imieñedicue. O rafue raise uiñoñedicue. Omoí comini cuemo ona fecadimaci. Jusiñamui diga nanoca ñairaini cuemo jiai fecadimaci. ¿Nie isoide marañede rafuena finodio?

³⁶ Jesús uai ote:

—Eniruemo cominina sedañedicue. Judíuái illaicomini cuena gaitañellena, eniruemo cominina sedadicedena, cue comini cue facaina fuiridimaci.

³⁷ Pilato uai ote:

—Íe jira odi illaimadio.

Jesús uai ote:

—Jaca railla. Uanaicino llo llona, jeicigacue. Nana uanaicínona jitaidino cue lluaña cacadimaci.

³⁸ Pilatodi Jesús uaina uaitajamona, raite:

—¿Nie uai naidi uaina?

Íe mei dane jino billano, cominimo llote:

—Jaca nicino naimiemo iñede.

Jesúna coraiacana rafue

(Mt 27.15-31; Mr 15.6-20; Lc 23.13-25)

³⁹ Pilato nia llote:

—Naga año pascua railla rafue illa facaise, damie cárcelmona jino ollena, cuemo jicanuaibisoidomoi. Bie año omoi jitaia, omoi illaíma raillamiena marena oretaiticue.

⁴⁰ Comini dinena cuiriidimaci:

—Dama ite. Bimiena jitaiñedicaí. Barrabásna cárcelmona marena jino oreta. —Iese cuiriidimaci. Barrabásdi firiraíma.

19

¹ Ie mei Pilato Jesúna oni uillanona, naimiena sechedotade. ² Jifanodosillena, soldadauí eecuaímona finoca nuiciraina naimie ifogimo jitadimaci. Jiduirede iniroina jitatajano raitimaci:

³ —Judíuaí illaímadío. —Iemei ie uiecona bucoidimaci.

⁴ Pilato dane jino billano, raite:

—Naimie omoi dine jino ja biite. Naimiemo nicinodi iñede —raite.

⁵ Ie facaise Jesús jino bite. Eecuaímona finoca nuiciraina jitaca. Jiduirede iniroina jitaca. Pilato naimacimo llote:

—Jadi, naimie.

⁶ Jusiñamui diga nanoca ñairainidi, jiaie illaícomini diga, naimiena ciuano, cuiriidimaci:

—Naimiena corai.

Pilato llote:

—Naimiemo nicinodi iñede; ia oni uillanona, naimiena omoi corai.

⁷ Uai otimaci:

—Moisés micori jaie cueda: “Bu Jusiñamuina jeare ñaianona, fiodailla”. “Jusiñamui Jitodicue” naimie railla jira, naimie fiodailla. Naimie Jusiñamui Jitona abina caitadimie. Caimona naimiedi marañede rafue jai finode.

⁸“Naimiedi Jusiñamui Jito” comini raillana Pilato cacajano, eo jacinaite. ⁹Jesúna dane fo uite. Jesúsdi Jusiñamui Jitona naimie raise uifollena, Jesúsomo jicanote:

—¿Ninena bitio?

Jesús uai oñede. ¹⁰Ie jira Pilato dane jicanote:

—¿Bue ñellena cue uaina oiacañedio? Uai cuemo ite, o marena oretallena. Uai cuemo ite, ona coratallena.

¹¹Jesús uai ote:

—O anamo Jusiñamui cuena itataja jira, o uai ite, cuemo llollena. Ie jira omo cuena fecadino o baifemo jeacino finodimaci.

¹²Ie facaimona Pilato Jesús marena jino oretaiacade; iadedi judíuai illaicomini dinena cuiriisite:

—Bimie o jino marena oretai, cai nanoca illaíma ie nabañedio. “Illaímadicue” Jesús llua-mona, cai nanoca illaíma díbeimo naimiedi iñede. Cai nanoca illaímadí César.

¹³Comini lluaana cacajano, Pilato Jesúsna jino atide. Ie cominimo lloranomo raide. Naie illano nofinina mameciredede. Judíuai uaido Gabatana mameciredede. ¹⁴Pascua rafue guilla finoraruijoma naidai illanona, Pilato dinena llote:

—Jadi, omoi illaíma.

¹⁵Iemona cominidí cuiriisite:

—¡Naimie oni uillanona, naimiena meine!
¡Naimiena coraí!

Pilato jicanote:

—¿Bue ñellena omoi illaimana coraiticue?
 Jusiñamui diga nanoca ñairaini uai otimaci:

—Cai illaimadi César. Jiaie illaimadi caimo iñede.
 Jaca dallaimade cai illaimadi.

¹⁶ Ie mei Pilato naimacimo naimiena fecade,
 coraillena.

Jesúna coraiacana rafue

(Mt 27.32-56; Mr 15.21-41; Lc 23.26-49)

Pilato llua jira, Jesúna uitimaci coraillena.

¹⁷ Jesúdi ie cruzna rocaoicaida sonode. Ifocoraína
 eruaila mameciredede illanomo jaidimaci. Judíuai
 uaido naie illano Gólgotana mameciredede.

¹⁸ Nainomo naimiena coraidimaci. Naimie abimo
 menamie coraica. Damie Jesús nabeimo. Jiaimie
 jarifebeimo. ¹⁹ Cruzmo jonellena, Pilato rabicimo
 cuetatate: “Nazaret ie Jesús. Judíuai Illaima”.

²⁰ Judíuai uaido cuega. Romanos comini uaido jiai
 cuega. Griego uaido jiai cuega. Jesús coraiano
 Jerusalén ianori illa jira, ailluena comini iena
 cioidimaci.

²¹ Iena ciuamona, naie rabicina meidollena,
 Jusiñamui diga nanoca ñairaini Pilatomo llotimaci:

—“Judíuai Illaima” raillano jai cuetatatio. Iena
 meiduana jitaidicai. Bimie dinena raisoide:
 “Judíuai Illaimadicue” raillanona, o cuetatajana
 jitaidicai

²² Pilato uai ote:

—Jai cuetataticue. Jiaie rabicimo dane cue-
 tatañeiticue.

²³ Jesúna coraia mei, soldaduai naimie iniroi
 uanona, naga soldado digamie jonega iniroi. Na-
 gaamaga soldaduai ite. Ie camisa fiebide. Naie

daje jamai nigaroi. ²⁴ Ie jira dani coniniri ñaitimaci:

—Bie camisa cuaranoñeiticai, dani cai fecallena. Mai. Conima jabomaiticai, iena ollena. —Iese finuano Jusiñamuina lloraima micori ciegafuiai suide. Jaie cuega: “Cue iniroi dani naimacimo fecaitimaci; iadedi cue camisa ollena, conima jabomaitimaci”. Iese finodimaci.

²⁵ Cruz abimo Jesús ei, ie euiño diga ite. Cleofas aidi ite. Naiñaiño mameci María. María Magdalena jiai ite. ²⁶ Jesús ie eina ciode. Cuenaiñaiño ecimo jiai ciode. Cuenaiñaiño eo gaide. Ie jira ie eimo llote:

—Jadi, o jito isoi itimie anamo iitio.

²⁷ Cuemo llote:

—Jadi, o ei isoidiñaiño anamo iitio.

Naie dacaiño naiñaiñoña cue jofomo uillanona, naiñaiñoña sedadicue.

²⁸ Ie mei Jesús nana rafue jai fuillana uiñuano, llote:

—Jiroacadicie. —Iese lluanona, Jusiñamuina lloraima micori jaie ciegafuiai jai suide.

²⁹ Nainomo llerojimo vino ite. Radosimo fibecode rana joniano, vinomo faite. Iemei Jesúsimo fecade jaronollena. ³⁰ Iena jaronuano, Jesús llote:

—Cue maijia jai fuite. Jai macaibaite. —Ie ifogi ana jitadacaida, fiodaite.

Jesús sida diga ducia rafue

³¹ Pascua railla rafue guille finuarui illa jira, judíuai illaicomini Pilato dine jaidimaci. Raire fiodaillena, coraicano idaiaina uellullena naimiemo jicanuaidimaci. Sábado rafue ie nairui nia illanona, sábadorui jai raire taineacana jira, coraicano cruzmo sábadoruimo illana

jitañedimaci. ³² Soldaduai jaillano, Jesús ecimo coraica iaiaiaia idaiaina uellude. ³³ Jesús dine billano, naimie jai fodaillana ciodimaci. Ie jira naimie idaiaina uelluñedimaci; ³⁴ iadedi daje soldado Jesús ciraigiconi sida diga ducide. Naifo diaide. Naifomona jinui jiai bite. ³⁵ Nana iena ciodicue. Uanai lloticue. Omoi inollena, iena lloticue. ³⁶ Soldaduai iese finuamona, jaie cuegafuiai jai suide. Jaie Jesúna cuega: “Naimie illaicina tainoñeitimaci”. ³⁷ Jiai jaie cuega: “Judíuai dinena naimaci ducitagamiemo ico eruaitimaci”.

Notici ifomo Jesús raia rafue

(Mt 27.57-61; Mr 15.42-47; Lc 23.50-56)

³⁸ Naie facaise Pilato dine José raillamie jaide. Cruzmona Jesús abi oni ollena, Pilatomo jicanuaide. Josédi Arimatea nairai imie. Pilato fairiote. Ie jira José Jesús abi ana uanona, iena oni uite. Judíuai illaicominina naimie jaciruillanona, Jesúna bainino inote. ³⁹ Nicodemo jiai bite. Siorede rana atide. Mirra áloe diga jai tamiano atide. Nibai treinta kilos atide. Naimiedi Jesús dine naiona navui bite. ⁴⁰ José, Nicodemo diga, Jesús abina useroina ferinotiaiaiaia. Naimaci comini finouilla isoi, naie siorede radi iniroimo jonega. ⁴¹ Amenaiaia iaie illanomo Jesúsdi coraica. Nainomo notici ie raiafodi ite. Nia buna naifomo raiafona. ⁴² Naifo iaie illa jira, sáadorui jai riacana jira, jiaie raiafo jenollena abi juanina jira, nainomo naimiena jonetiaiaiaia. Notici diga raiafo raise ibaila mei, jofomo jaidiaiaiaia.

20

Fiodaillamona, Jesús jillua rafue (Mt 28.1-10; Mr 16.1-8; Lc 24.1-12)

¹ Domingo jítiramo nia monaiñenia, raiafomo María Magdalena jaide. Raiafo ibailla nofici oni joillana ciode. Jesús abina cioiñede. ² Ie jira aisicana Pedrona jenuaide. Cuena jiaí jenuaide. Baillano, llote:

—Cai illaicomini cai Nama abina raiafomona otimaci. Naimiena jonianona uiñoñedicue.

³ Ie mei raiafomo jaidicoco. ⁴ Aisicana jaidicoco; iadedi riire cue aisicana jailla jira, nano ridicue.

⁵ Ana bitadacaida, fo erodatucemo, useroi joillana ciodicue; iadedi fo jaiñedicue. ⁶ Ie mei Simón Pedro rillano, fo jaide. Useroi joillana jiaí ciode.

⁷ Ie ifogimo ferinoga iniroi eneno illana ciode. Raise nacuana ciode. ⁸ Iemei jiaí fo jaidicue.

Iniroina ciuamona, Jesús jai jilluana inoticue. ⁹ Jaie ciegafuiaí llote: “Fiodaillamona jilloite”. Naie ciegafuiaina como raise inoticoco. ¹⁰ Ie mei jofomo jaidicoco.

María Magdalenamo Jesús bairia rafue (Mr 16.9-11)

¹¹ Raiafomo abido billano, coco jailla mei, nainomo María fiebide. Eede. Ana bitadacaida, fo erodatemo, ¹² Jusiñamuimona mena jaienici jai billana ciode. Userede iniroi jítadiaimaiaí. Jesúsna navui jonianomo ana raidiaimaiaí. Damie ifogi díbeimo raide. Jiaimie eilli díbeimo raide. ¹³ Naiñaiño mo jicanotiaimaiaí:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena jonianona jai uiñoñedicue.

¹⁴ Naie facaise jinafo dine erocailanona, Jesúsna ciodede; iadedi naimiena uiñoñede.

¹⁵ Naiñaiño comecina facade; “Naimiedi bie illano sedaraima”. Jesús naiñaiño mo jicanote:

—¿Bue ñellena eedio? ¿Bu jenodio?

Naiñaiño uai ote:

—Jesúna o uia, naimie jonianona cuemo llono. Ie mei naimiena oni uiticue.

¹⁶ Jesús dinena uai ote:

—¡María!

Naimie dine naiñaiño como raise dobaicaide. Judíuai uaido llote:

—¡Raboni! —Naie uai oni dobaiñuamona: “Llofueraima”.

¹⁷ Jesús uai ote:

—Cuena lliñoñoeno cuena faicai. Cue Moo dine nia a jaiñedicue. Cue amatiai dine mai jaillanona, cue rafuena luai. Cue Moo dine jaiticue. Naimiedi cue Jusiñamui. Naimie jiai omoi Moo. Jiai omoi Jusiñamui.

¹⁸ Ie jira María Magdalena Jesús llofueoicaiganodicaimo luaibite:

—Cai Namana jai ciodicue. —Iemei caimo naimie naiñaiño mo lluaana llote.

Jesús ie llofueoicaiganomo bairia rafue

(Mt 28.16-20; Mr 16.14-18; Lc 24.36-49)

¹⁹ Domingo naio Jesús llofueoicaiganodicai jofomo ofidicai. Judíuai illaicomina cai jaciruillamona, nasiai nana cai ibaica. Nase econoñoeno ieconi Jesús cai motomo billanona, caina uaiduano, llote:

—Uri omoï i.

²⁰ Ie onollina acatate. Ie ciraigina jiai acatate. Cai Namana jai cai ciuari eo iobidicai. ²¹ Jesús dane llote:

—Uri omoï i. Cue Moo cuena oretaja isoi cue rafuena llollena, omoïna oretaiticue.

²² Ie facaise caina firaiñuanona, raite:

—Jusiñamui Joreñona omoï feiñuana jitaïdicue.

²³ “O jeacina jai dotade” bumo omoï lloia, Jusiñamui jai dotaca. “O jeacina nia dotañede” bumo omoï lloia, Jusiñamui nia dotañega.

²⁴ Naie naio Tomásna mameciredede llofueoicaigamie cai diga iñede. Dídimona jiai mameciredede. Naimiedi gorasa. ²⁵ Naimiemo lloticai:

—Cai Namana ailli ciodicai.

Tomás uai ote:

—Clavo ifona naimie onolli jeraimo cue cioñenia, naie ifona cue jetañenia, naimie ciraigi ifona cue jetañenia, ñinoñeiticue.

Jesús ie llofueoicaiganomo dane bairia rafue

²⁶ Ocho digarui illanona, Jesús llofueoicaiganodicai dane ofillano, Tomás cai diga ite. Nana nasiai ibaica; iadedi nase econoñeno ieconi Jesús cai motomo dane fo billano, uaiduano, llote:

—Uri omoï i.

²⁷ Iemei Tomásno llote:

—Eroda cue onollimo. Naifo jeta. Ciraigi ifona jiai jeta. ñinoñeno jaiñeno. Mai ñino.

²⁸ Tomás uai ote:

—Cue Namadio. Cue Jusiñamuidio.

²⁹ Jesús dane uai ote:

—Cuena o ciua jira, cuena ñnotio; iadedi cuena cioiñedino cuena ñnoia, jiaí caimare iitimaci.

³⁰ Jesús diga siño rafuena finode. Iena ciodicai. Nana naie rafuena bie rabenicomo cueñedicue; ³¹ iadedi dajerie cueticue. Jesúsdi cai Jilloitaramana omoi ñnollena, iena cueticue. Naimiedi Jusiñamui Jitona omoi ñnollena, iena jiaí cueticue. Naimiena omoi ñnuano, naimie diga jaca iitomoí.

21

Jesús ie llofueoicaiganomo ane bairia rafue

¹ Diga irui illanona, Tiberiana mameciredede jorai fuemo Jesús ie llofueoicaiganodicaímo dane bairede. ² Nainomo diese iticai: Simón Pedro, Tomás, Natanael, cue ama Jacobo, cue, jiaíe iaímaiaí. Tomás mameci jiaícidí Dídimó. Natanael Galilea ie Caná nairai imie. ³ Simón Pedro caímo llote:

—Lloiji faíaiticue.

Naimie uai oticai:

—O diga jaiticai. —Iese raillano, botemo jaidicai. Namona naío lloijina faiticai; ia jaca buena oñedicai. ⁴ Monaiacademo, Jesús jorai fuemo bite; iadedi naimiena uíñoñedicai. ⁵ Jesús caímo jicanote:

—Caimaci, ¿nie diese lliciaína jai otomoí?

Uai oticai:

—Jaca oñedicai.

⁶ Naimie dane uai ote:

—Omoi bote nabei ñine omoi lloijina faíno.

Ie jira faiticai. Ailluena lliciaí naiemo jilla jira, a aiñonidicai. ⁷ Iena ciuamona, Pedromo lloticue:

—Cai motomo cai Namadi ite.

Pedro iena cacajano, naimie taimiena jira, ie iniroi jitade. Jesús dine naimie raire rillena, joraimo daiade; ⁸ iadedi botedo biticai. Enirue iaie illa jira, na lliciaimo sonocana, lloijina atidicai. Nibai cien metros oni ite. ⁹ Jorai fuemo cai ria, coocimona bonoca iraina cidicai. Lliciai iraimo ruica jai ite. Llomenico jiai ite. ¹⁰ Jesús caimo llote:
—Omoi oga lliciaimona janore ati.

¹¹ Ie jira Simón Pedro botemo jaillano, lloijina llinuanona, eniruemo ari sonode. Ciento cincuenta y tres jemierie jitaticai. Ailluena ite; iadedi lloiji cuarariñede. ¹² Jesús llote:

—Mai guisaibi. —Jesúna cai uiñua jira: “¿Budío?” jaca buna raiñena. ¹³ Jesúsdi llomenico diga lliciaina caina ecade. ¹⁴ Fiodaillamona jillua facaisemona dacaiño amani caimo Jesús jai abina bairetate.

Jesús Pedro diga ñaia rafue

¹⁵ Guilla mei, Jesús Simón Pedromo llote:

—Simón, odi Juan jitodio. —Jiai jicante— ¿Nana o nabaiñiai baifemo cuena isiruitio?

Simón uai ote:

—Jii, Nama, ona cue isiruillana uiñotio.

Jesús uai ote:

—Toica laudaiai uruiaina omoi raise sedaja isoi, cuena inotinona raise seda. Naimacina cue rafuena raise llofue.

¹⁶ Dane llote:

—Simón, odi Juan jitodio. —Dane jicante— ¿Cuena isiruitio?

Simón uai ote:

—Jii, Nama, ona cue isiruillana uiñotio.

Jesús dinena uai ote:

—Toica llaudaiaia uruiaina omoi raise sedaja isoi, cuena ñnotinona seda.

¹⁷ Dane jicanote:

—Simón, ¿cuena isiruitio? —Jesús naimiemo dane jicanua jira, “Jesús cue uaina ñnoñede” railanona, Pedro comeci sunaite.

Uai ote:

—Nama, naga rafuena uiñotio. Ona cue isiruillana uiñotio.

Jesús uai ote:

—Toica llaudaiaia uruiaina omoi raise sedaja isoi, cuena ñnotinona seda. ¹⁸ Daje rafue omo nia lloiticue. O nia conirue facai o ñiroi dama jítadio. Ie mei o jitaillanomo jaidio. O uaicroma facaiseconi o onolli oni ñuitaitio. Ie mei jiaimie o ñiroi ona jítajano, o jitañenanomo ona uite. Cue llua ñnocana o jai.

¹⁹ Fiodaillena Pedro uiñollena, uicodo Jesús iese llote. Cristo llua isoi, Cristo rafue muidona, illacomini Pedrona jiairuido meinetimaci. Naimie fiodaillanona, Jusiñamuina iobitade.

Jesús ie gaia llofueoicaigamiemo llua rafue

²⁰ Pedro diga Jesús nia ñaia facaise, Pedro dobaicaillanona, cuena cide. Iaimaiaia jinafona racadicue. Jesús gaimiedicue. Navui cai guia, Jesús nia fodañenia, Jesús abimo cue ia, Jesús mo jicanoticue: “¿Bu gaitatallio?” ²¹ “Cuena ñnotinona seda” Pedromo Jesús llua mei, Pedro dobaicailanona, cuena ciuano, Jesús mo jicanote:

—Nama, ¿ñiese naimie fodaite?

²² Jesús uai ote:

—Naimie nia itemo, cue abido bia, dama iesede. Naimie rafuedi omo duiñede; ia cue llwana ñnocana o jai.

²³ Ie jira creyentiaí naie llwana fidiano cuena raitimaci:

—Naimie fioldaiñeite. —Iese raitimaci; iadedi Jesús iese raiñede. Jesús llote: “Naimie nia itemo, cue abido bia, dama iesede. Naimie rafuedi omo duiñede”.

²⁴ Nana rafuena ciuano lloticue. Iena cueticue. Uanaicinuaina cueticue.

²⁵ Jesús ailluena jiaie rafuena finode. Nana ie rafue cuedadena, enirue baiñede, naie libros eenollena. Mai. Juandicue.

**Jusiñamui uai: Jusiñamui jito rafue illa
rabenico**
**New Testament in Huitoto, Murui (PE:huu:Huitoto,
Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022

145a1f66-dca1-5de3-9c00-4e533605e488